

Հայկական գիտահետազոտական հանգույց
Armenian Research & Academic Repository



Սույն աշխատանքն արտոնագրված է «Մտերծագործական համայնքներ
ոչ առևտրային իրավասություն 3.0» արտոնագրով

This work is licensed under a Creative Commons Attribution-NonCommercial
3.0 Unported (CC BY-NC 3.0) license.

Դու կարող ես.


սրտնենել և տարածել նյութը ցանկացած մեդիայով կամ կրիչով
մեջբերել կամ օգտագործել առկա նյութը ստեղծելու համար նորը


You are free to:

Share — copy and redistribute the material in any medium or format

Adapt — remix, transform, and build upon the material

Деревья





947-325

«ՍԵՒԱՆ» ՀՐԱՏԱՐԱԿԶԱԿԱՆ ԸՆԿԵՐՈՒԹԻՒՆ ԹԻՒ 3

ՌՈՒԲԷՆ ԴԱՐԲԻՆԵԱՆ

ԲՕԼՇԵՒԻԶՄԸ
ԵՒ
ՀԱՅԱՍՏԱՆԸ

(ԵՐԿՐՈՐԴ ՏՊԱԳՐՈՒԹԻՒՆ)



ԻԶՄԻՐ

Տպագրութիւն Քէշիշեան

1933

“ՍԵՒՎՆ,” ՀՐԱՏԱՐԱԿԶՈՒԿԱՆ ԸՆԿԵՐՈՒԹԻՒՆ

«Սեւան» հրատարակչական ընկերութիւնը շահակ-
ցական անուանումներու հետանկարիւն չի ձգտիր երբեք:

Մեր կեանքին հարկեցուցիչ պահանջներէն մին շը-
րացնելու մտածուք՝ մեր ծրագրին հիմնաքարը եղաւ:

«Սեւան» հրատարակչականը գրքի գրականութեան
մշակման կը ձգտի: Այդ մեկնակէտը խնամուած ու ծա-
ւառական աշխատութիւններով պիտի օժտէ մեր գրակա-
նութիւնը:

Գրական գեղարուեստական գործերէն զայս մեկ
չպիտի մոռնանք այս ցեղին բարոյական կորով ներշնչող
հրատարակչութիւններ սալ:

կրորդ գործը. Մասեւաշար
յդ ուղղութեամբ մեր հե-
ւոյս մեկ օրինակն է:
նը գրագէտներու հետ ու-
նարեւիտ յետոյ պիտի ծա-
գործեան, որով մեզիս
կան էն:

նկատողութեան
նէլ մեր հասցէն

“Sévan,”
chi, Rue Imam No. 67
Smyrne

47.925
26
7-
329.14

ՌՈՒԲԷՆ ԴԱՐԲԻՆԵԱՆ

ԲՕԼՇԵՒԻԶՄԸ

ԵՒ

ՀԱՅԱՍՏԱՆԸ

(ԵՐԿՐՈՐԴ ՏՊԱԳՐՈՒԹԻՒՆ)



ԻԶՄԻՐ

Տպագրութիւն Բէշիշեան

1922



Է91
~~ՉԷՏԻ~~
82118
A

THE UNIVERSITY OF CHICAGO

LIBRARY


1920

1920


1920

1920

1920



ԲՕԼՁԵՒԻԶՄԸ ԵՒ ՀԱՅԱՍՏԱՆԸ



Դժուար է երևակայել աւելի դաժան, աւելի դի-
ւային ծաղր՝ ուղղւած և՛ Հայաստանի, և՛ սօցիալիզ-
մի հասցէին, քան ախտաւոր մտայնութեամբ բռնւած
հայ մարդկանց ձգտումը այսօր եւ եթ, բռնի ոյժով
փորձ անել մտցնելու այս աւերակ ու դժբախտ երկ-
րում սօցիալիստական կարգեր:

Եթէ անտարակուսելի է, որ այդպիսի մարդկանց
շարքում կան ոճրագործ, բաղդախնդիր տարրեր, ո-
րոնք, «կարմիր», «յեղափոխական», «կօմմունիստա-
կան» ֆրազների տակ թագնւելով, հետապնդում են
իրենց անձնական մութ նպատակները, պղտոր ջրում
ձուկ են կամենում որսալ, — ապա, նոյնքան անտա-
րակուսելի է, որ կան նաև մոլորւած մարդիկ (և նը-
րանք անշուշտ մեծամասնութիւն են կազմում), ո-
րոնք իրենց շատ երիտամարդ հասակի, կարճատե-
սութեան, թեթևամտութեան, տեմպերամենտի կամ
տգիտութեան պատճառով ի վիճակի չեն իրենց պարզ
հաշիւ տալու, թէ ի՞նչ են անում և ի՞նչ բանի են ի-
րօք ձգտում:

Ահա այդ մարդկանց է, որ ես ուղղում եմ իմ
խօսքը:

I

ՖՐԱԶՆԵՐՆ ՈՒ ՓԱՍՏԵՐԸ

Մարդկային պատմութեան մէջ հազիւ թէ գտնւի
մէկ ուրիշ քաղաքական կուսակցութիւն, որ այնքան
կարճ ժամանակում այնքան հիմնական կերպարանա-
փոխման ենթարկւէր, որքան ռուս բօլշևիկները: Այն,
ինչ որ դեռ երէկ սրբութիւն սրբոց էր նրանց հա-

մար, այսօր դառել է միայն «բուրժուական նախա-
պաշարմունք» և ծաղրի առարկայ: Եւ, ինչ որ ամե-
նից աւելի զարմանալի է, ոչ ոք այդ բօլշևիկներից,
հրաժարւելով իր երէկ պաշտած դաւանանքներից,
որոնց համար նա այնքան մեծ կռիւ է մղել առաջ,
չի զգում խղճի որւէ խայթ, մտքի որւէ տարակու-
սանք, կամքի որւէ տատանում: Կարծես մի ծանր
բեռ է որ դէն է շարտուում...

Երբ բօլշևիկները ձգտում էին տակաւին իշխա-
նութեան, թերեւս ոչ-ոք նրանցից աւելի մեծ մոլե-
ռանդութեամբ եւ անվերապահութեամբ չէր պաշտ-
պանում խօսքի ու մամուլի ազատութիւնը, անձի և
բնակարանի անձեռնմխելիութիւնը, Տ-ժամեայ բան-
ւորական օրը, բանւորների ազատ կազմակերպման
իրաւունքը, նրանց անբռնադատ պայքարը իրենց ի-
րաւունքների ու շահերի պաշտպանութեան համար,
Սահմանադրական ժողովի գումարումը, ամենալայն
աամկաւարական սկզբունքների անմիջական ու ան-
պայման կիրառումը և այլն և այլն:

Երբ նոյն բօլշևիկները տիրացան իշխանութեան,
խեղդեցին մամուլն այնպէս, ինչպէս ոչ մի ժամանակ
չէր յանդգնել անելու նոյնիսկ ցարական ռեժիմը,
գրաւեցին բոլոր տպարանները, թղթի ամբողջ պա-
հեստը, փակեցին բոլոր թերթերը, բոլոր բերաննե-
րը, ցրեցին Սահմանադիր ժողովը, վերացրին բոլոր
սահմանադրական երաշխիքները ու ստեղծեցին մի
այնպիսի մահասարսուռ դրութիւն, երբ ոչ-ոք, բացի
բօլշևիկներից, վստահ չէր կարող լինել, որ իրան
չեն բռնի ու չեն գնդակահարի ամենաչնչին կասկածի
համար, ոչ-ոք վստահ չէր, որ առաւօտ փողոց դուրս
գալով պիտի վերադառնայ տուն կամ տանը՝ անկողին
մտնելով՝ առաւօտը պիտի գտնի իրան իր անկողնի
մէջ: Եւ այսպէս գահավիժելով, ի վերջոյ սկսեցին

կրճատել նաև բանւորների իրաւունքները ու ոչ միայն վերացրին Ց-ժամեայ բանւորական օրը, այլ և մտցրին 10-12 ժամեայ ստիպողական աշխատանքը:

Նրանք, որ ամենակատաղի հակառակորդներն էին պատերազմի ու միլիտարիզմի. նրանք, որ հրապարակ եկան անմիջապէս և ամեն գնով հաշտութիւն կնքելու և խաղաղութիւն հաստատելու խոստումով և դրանով իրենց կողմը գրաւեցին մոլորւած ու յոգնած ժողովրդական զանգւածները, ոչ միայն իրենց հետ չբերին խաղաղութիւն, այլ և առաջ բերին մի անհամեմատ աւելի աւերիչ ու մարդաջինջ պատերազմ, քան պատերազմն էր Դերմանիայի հետ: Ամբողջ երկիրը դարձրին մի պատերազմական բանակ, որին զոհեցին ամեն ինչ. քանի քանի միլիոններ մեռան բօլշևիկների յարուցած այդ դժբախտ ներքին պատերազմի ընթացքում գնդակից, սովից, հիւանդութիւններից... Եւ մինչ Եւրոպական բոլոր պատերազմող պետութիւնները արդէն վաղուց կնքել են հաշտութիւն և վայելում են խաղաղ կեանքի բարիքները, դժբախտ Ռուսաստանն իր խելայեղ ընթացքով չկարողացաւ տակաւին հանգիստ գտնել: Եւ այսօր էլ դեռ առատօրէն հոսում է նրա խեղճ զաւակների արիւնը սազմի դաշտերում:

Որքան միամիտ ու կոյր են մեզանում այն մարդիկ, որոնք հաւատում են կամ կամենում են հաւատացնել ուրիշներին, թէ ոուս բօլշևիկները, որոնք գրեթէ հրեք տարւայ ընթացքում ի վիճակի չեղան իրենց հայրենի երկրին հաշտութիւն բերելու, պիտի ընդունակ լինեն աւելի լաւ տնօրինելու մեր հայրենիքի բախտը: Ողորմելիներ. նրանք չեն հասկանում կամ չեն ուզում հասկանալ, որ բօլշևիկները կարող են միայն բոլոր Ֆրօնտների վրայ աւելացնել մի նոր, բոլորից աւելի վտանգաւոր և արիւնալի ֆրօնտ—

Ներքին Ֆրոնտ :

Երբ բօլշևիկները դեռ իշխանութեան գլուխ չէին կանգնած, անսպասելի աղմուկով և մոլեգնութեամբ կուռում էին գաղտնի դիպլոմատիայի և գաղտնի քաղաքականութեան դէմ: Բայց բաւական էր, որ նրանք տիրանային իշխանութեան, և ամեն ինչ հիմնովեր շրջւեց: Պարզւեց, որ գաղտնի դիպլոմատիան ու գաղտնի քաղաքականութիւնը ատելի են եղել բօլշևիկներին միայն այն պատճառով, որ ուրիշներն են վարել այդպիսի քաղաքականութիւն եւ դիւանագիտութիւն: Բայց երբ քաղաքականութեան և դիւանագիտութեան վարիչներն իրենք բօլշևիկները դառան, սկսեց գաղտնի դիպլոմատիայի և քաղաքականութեան մի այնպիսի շրջան, որի հետ կարող են մրցել միայն Երիտասարդ թիւրքերը քաղաքական պայքարի իրենց արևելեան նեւք, դաժան ու դաւադրական մեղոտներով: Պրօվօկացիա, կաշառք, դաւ, սադրանք, գաղտնի ագիտացիա, գրգռում, կազմակերպումն հակապետական տարրերի՝ խռովութիւններ և ապստամբութիւններ առաջ բերելու համար օտար երկրներում — ահա այն զազրելի սխտեմը, որ ունս բօլշևիկներն ամբողջովին ժառանգեցին ցարական ռեժիմից և կատարելագործեցին մինչև վերջին աստիճան, օգտւելով Երիտասարդ թիւրքերի և գերման իւնկերների զարհուրելի փորձից: Բօլշևիկների Արևելքում վարած մութ և քստմնելի քաղաքականութիւնը պերճախօս արտայայտութիւն է ասիական բռնակալներին յատուկ այդ տմարդի սխտեմի:

Նոյնը մենք տեսնում ենք բօլշևիկների վարած ներքին քաղաքականութեան մէջ: Նրանք, որ այնքան յամառօրէն, այնքան յախուռն կերպով և այնպիսի մեծ ցասումով կուռում էին ցարական «օխրանկայի», գաղտնի ոստիկանութեան արիւնարբու դա-

իճների դէմ, ստեղծեցին պատմութեան մէջ աննա-
ընթաց մի այնպիսի դժոխային մեքենայ, կազմա-
կերպութիւն՝ «Չրեզվիչայգան», որի առջև միանգա-
այն նսեմացաւ հռչակաւոր ցարական «օխրանկան»
իկ :

Չափազանց բնորոշ է բօլշևիկների համար նաև
նրանց վերաբերմունքը դէպի ազգային ինքնորոշման
սկզբունքը : Երբ դեռ իշխանութիւնը նրանց ձեռքում
չէր, նրանք չտեսնուած թափով ու անվերապահու-
թեամբ պաշտպանում էին ամեն մի ազգի բացարձակ
իրաւունքը իր կամեցած ձևով որոշելու իր բախտը :
Այդ պաշտպանութիւնը կրում էր այնպիսի մոլեգին
բնոյթ, որ ողւս ազգայնական տարրերը ամենայն ան-
կեղծութեամբ համարում էին բօլշևիկներին՝ հայրե-
նիքի, Ռուսաստանի թշնամիներ : Բայց, երբ իշխա-
նութիւնն անցաւ բօլշևիկներին ձեռքը, նրանք հետզ-
հետէ այդ հարցումն էլ երևան բերին իրենց իսկական
էութիւնը : Նրանք չկամեցան մի անգամ ընդմիջտ ճա-
նաչել Յարական Ռուսաստանի ճիրաններում տաս-
նեակ ու հարիւրաւոր տարիներ տանջուած փոքր ազ-
գերի անկախութիւնը և միանգամ ընդմիջտ հրաժար-
ւել նրանց ներքին գործերի մէջ խառնուելու վատթար
սովորութիւնից : Աւելին . գրեթէ երկու տարի բօլշե-
ւիկները ոչ մի միջոց չխնայեցին նորից իրենց իշխա-
նութեան ենթարկելու Ֆինլանդիան, Էստօնիան, Լատ-
ւիան, Լիտւան, Բելոռուսիան, Լեհաստանը, Ուկրայ-
նան, Վրաստանը և այլն : Անվերջ ինտրիգներ, դաւեր,
կաշառք, ներքին խռովութեանց և ապստամբութեանց
կազմակերպում— ահա միջոցներ, որոնց նրանք դի-
մեցին և դիմում են այսօր էլ, ներսից պայթեցնելու
այդ երկրների անկախ քաղաքական գոյութիւնը : Եւ
պատերազմ, պատերազմ ու պատերազմ ցարական ա-
նիծեալ լուծից նոր ազատուած փոքր ազգերի դէմ՝

դրսից նւաճելու համար նրանց ամեն անգամ, երբ ներքին ինտրիգներն ու դաւերը չէին յաջողուում:

Այս բոլորը պարզ ցոյց է տալիս, որ յեղափոխութիւնը և յեղափոխական ֆրազէօլօգիան ոչինչ չէ փոխել իրօք ոուս բռնապետական ժողովրդի հոգումէջ:

Յարը գնաց, եկան ուրիշները նրա տեղ, բայց ոուս ժողովուրդը, նրա ոգին մնաց նոյնը: Եւ բնական է, որ շատ քիչ բան ըստ էութեան պիտի փոխւէր նրա կեանքում: Բռնի ոյժով էր ստեղծել ոուս ազնւականութիւնն իր հսկայական Ռուսաստանը եւ բռնի սյժով էլ պահում էր նա իր հպատակութեան տակ իր բոլոր նւաճած օտար ազգերը: Ընկաւ ազնւականութիւնը. իշխանութիւնն անցաւ սօցիալական ուրիշ տարրերի և անհատների ձեռքը, բայց ոուս բռնապետական կամքն ու մտայնութիւնը մնաց նոյնը, որովհետև և՛ երէկւայ յետադիմական տէրերը, և՛ այսօրւայ «կարմիր» տէրերը միևնոյն ժողովրդի զաւակներն են: Ուստի այնքան դժւար է, ես պիտի ասէի, այնքան անկարելի՝ «կարմիրների» համար, ինչպէս և սևերի համար, հրաժարւել իրենց ազգային—քաղաքական յաւակնութիւններից եւ «պատմական իրաւունքներից»...

Ահա թէ ինչու բօլշևիկեան «կարմիր» Ռուսաստանն այնքան անվստահութիւն ու այնքան սարսափ է ներշնչում բոլորազատասէր ժողովուրդներին և առաջին հերթին՝ Յարական Ռուսաստանից պոկւած մանր ազգերին...

II

ՍՈՑԻԱԼԻՍՏԱԿԱՆ ԷՔՍՊԵՐԻՄԵՆՏԸ ԵՒ ԱԶԳԱՅՆԱԿԱՆ
ԷՌԻԹԻԻՆԸ

Ո՞րն էր այն սրբազան նպատակը, որին բուհե-
ւիկները զոհեցին տարիներ շարունակ իրենց փայփա-
յած սկզբունքներն ու դաւանանքները: Ո՞րն է այն
գերագոյն գաղափարը, որի համար բուհեւիկները կա-
տարեցին այնքան սարսափելի բռնութիւններ, նւի-
րաբերեցին միլիոնաւոր մարդկային կեանքեր:

Այդ նպատակն ու գաղափարը համաշխարհային
սօցիալիստական յեղափոխութիւնն էր և սօցիալիս-
տական կարգերի անմիջական իրագործումը: Մի նը-
պատակ էր այս, որ ամեն մի իրատես մարդու հա-
մար սկզբից իսկ դատապարտւած էր վիժման: Որով-
հետև սկզբից իսկ պարզ պիտի լինէր, որ Ռուսաս-
տանի նման տնտեսապէս, սօցիալապէս և կուլտուրա-
պէս յետամնաց մի երկիր ոչ մէկ դէպքում չի կարող
լինել առաջապահ՝ սօցիալիստական յեղափոխութեան
համար: Մի գերազանցապէս գիւղացիական երկիր,
ուր տակաւին իշխում է նահապետական տնտեսու-
թիւնը, ուր կապիտալիզմը դեռ նոր էր սկսել թոյլ
նւաճումներ անել, ուր ազգաբնակչութեան մեծագոյն
մասը գիւղացիութիւնն է կազմում և ուր բանւորու-
թիւնը համեմատաբար այնքան ողորմելի քանակ է
ներկայացնում, ի՞նչպէս պիտի կարենար յանկարծ,
մոգական գաւազանի մի շարժումով, սօցիալիստական
երկիր դառնալ:

Մարքսիզմի ամենամեծ երախտիքներից մէկը
մարդկութեան՝ այն է, որ ազատեց նրան այն վտան-
գաւոր, կործանարար ցնորքից, թէ սօցիալիզմի իրա-
գործումը միանգամայն կախւած է անհատների կամ
նոյնիսկ մասսաների բարի կամեցողութիւնից:

կար ժամանակ, գրեթէ մի դար առաջ, երբ մարդկութեան լաւագոյն զաւակներն անգամ այն միամիտ հաւատն ունէին, թէ ամենայն հեշտութեամբ կարելի է իրագործել սօցիալիզմը համոզելու ճանապարհով (Օուէն, Սէն-Սիմոն) կամ բռնի միջոցներով (Բարեօֆ, Բլանկի): Բայց եկաւ գիտական սօցիալիզմը յանձին Մարքս Էնգելսի ստեղծած հոյակապ սիստէմի և անվիճելի կերպով ապացուցեց, որ սօցիալիզմի իրականացման համար ամենից առաջ պէտք են առարկայական (օբիեկտիւ) նախապայմաններ:

Ո՞րոնք են այդ առարկայական պայմանները:— Կապիտալիզմի ծայր աստիճան զարգացումը, այնպիսի խոշոր կապիտալիստական տնտեսութեան գոյութիւնը, որն իր մէջ պարփակում է ազգաբնակչութեան խոշորագոյն մասը: Որովհետեւ առանց խոշոր կապիտալիստական տնտեսութեան՝ միանգամայն անիմաստ ու աննպատակ է դառնում արտադրութեան միջոցների սօցիալիզացիան. բացի այդ՝ առանց խոշոր կապիտալիստական տնտեսութեան անկարելի պիտի լինի ունենալ այն սօցիալական նպաստաւոր հողը, որի վրա միայն կարող է ստեղծուել ու մարզուել սօցիալական մեծ առաքելութեան համար ընդունակ, գիտակից, հասուն և կազմակերպ բանւորութիւն: Այնտեղ, ուր խոշոր կապիտալիստական տնտեսութիւնն իշխող չէ բացարձակապէս, ինչպէս, օրինակ, Անգլիայում, Բելգիայում, Գերմանիայում, այնտեղ, ուր կապիտալիզմի աճումը չի հասել իր գագաթնակէտին, չկան և չեն կարող լինել նաև այն նախապայմանները, որոնք բացարձակապէս անհրաժեշտ են սօցիալիզմի իրականացման համար, հետևաբար այնտեղ չի կարող որևէ լուրջ խօսք լինել սօցիալիստական կարգերի անմիջական ստեղծման մասին:

Բռնի ոյժով, անվերջ ահաբեկումներով ու արիւն-

հեղութիւններով չէ որ սօցիալիզը երբ և է պիտի իրականանայ: Նա կգայ մի օր այնպէս, ինչպէս կտուցի մի չնչին հարւածով ձուի մէջ հասունցած հաւի ձագուկը ջարդում է իր կեղեք և դուրս գալիս լոյս աշխարհ:

Այս բոլորը մարքսիզմի տարրական ճշմարտութիւններն են:

Լենինը մարքսիստ է և հեղինակ մարքսիստական մի լաւ գրքի՝ «կապիտալիզմի զարգացումը Ռուսաստանում». բօլշևիկներն իրենց մարքսիստներ են անւանում, նոյնիսկ միակ մարքսիստներ: Բայց եթէ նըրանք այսօր պահպանել են տակաւին մարքսիստական ֆրազէօլօգիա, մարքսիստական ոչինչ չէ մնացել նըրանց մէջ: Նրանց մտածողութեան եղանակը, նրանց գործելակերպն ամենաչնչին չափով անգամ չունի իր վրա մարքսիստական կնիք: Ընհակառակը, առանց վերապահութեան կարելի է պնդել, որ բօլշևիկների այժմեան աշխարհայեցողութիւնն ու վարած քաղաքականութիւնը մարքսիզմին տրամագծօրէն հակառակ բաներ են:

Հրապարակ գալով համաշխարհային Սօցիալիստական Յեղափոխութեան նշանաբանով, բօլշևիկները սկզբում, երբ դեռ որոշ չափով տարւած էին մարքսիստական հովերով, իրենց ուշադրութիւնը դարձրին դէպի Արեւմուտք:

Նրանք հաւատացնում էին, որ իրենց արածը սօցիալիստական մի «էքսպերիմենտ», փորձ է: Նրանք ասում էին, որ Ռուսաստանի յեղափոխութիւնն այն ժամանակ միայն յաջողւած պիտի համարել, երբ նա կը ցնցէ և սօցիալիստական յեղաշրջում առաջ կը բերէ կապիտալիստօրէն զարգացած արեւմտեան երկրներում: Շուտով երեք տարի կլինի, որ բօլշևիկները իշխում են Ռուսաստանում, բայց արեւմտեան ոչ մի

պետութիւն չհրապուրւեց նրանց «սօցիալիստական» փորձից և հազիւ թէ հրապուրւի: Որովհետև այդ իսկ փորձը բոլոր գիտակից սօցիալիստներին բերեց այն անյողողող համոզման, թէ ի՞նչ չպէտք է անել: Այդ փորձն Եւրոպայի բոլոր գիտակից սօցիալիստներին յետ մղեց «ասիական» սօցիալիզմից, ինչպէս նրանք որակեցին բօլշևիզմը, և նրա գործադրած ասիական մեթոդներից:

Եւ այսպէս, Արևմուտքը շնորհունեց Լենինի «ասիական» սօցիալիզմը, չը նայելով, որ բօլշևիկները կրաւորական սպասողի դերում չմնացին և ոչինչ չըխնայեցին ներքին խռովութիւններ հրահրելու համար արևմտեան երկրներում: Ճիշտ է, նրանց յաջողւեց պարտւած երկիրների մէջ, օգտւելով ժողովրդական մասսաների բնական դժգոհութիւնից, ապստամբական շարժումներ առաջ բերել (Գերմանիա, Հունգարիա): Բայց այդ բոլորն անցողական երևոյթներ էին միայն:

Բօլշևիկների համար պարզ էր արդէն, որ այլևս որևէ լուրջ սպասելիք չունեն բուրժուական և իմպերիալիստական Եւրոպայից: Եթէ նրանք լինէին շիտակ քաղաքական գործիչներ, նրանք պիտի հրաժարւէին անմիջապէս իշխանութիւնից, հէնց որ վիժեցին նրանց ծրագիրները Արևմուտքում, և յայտնէին, որ իրենց «սօցիալիստական էքսպերիմենտը» անյաջող վախճան ունեցաւ: Բայց իշխանութիւնը կուրացրել էր նրանց, և նրանք կարծում էին, որ, հաստատելով իրենց իշխանութիւնն երկրում, նրանք հաստատում էին նաև սօցիալիզմը: Եւ որովհետև սօցիալիզմի անմիջական իրականացումը Ռուսաստանում անկարելի բան էր, իսկ իշխանութեան հաստատումը հնարաւոր, բօլշևիկներն սկսեցին լքել իրենց սօցիալիստական դիրքերը, մէկը միւսի յետևից, և իրենց բոլոր ճիգերը ուղղեցին մի նպատակի՝ իրենց

իշխանութեան ամրապնդման: Բայց իշխանութեան ամրապնդումը մի պետութեան մէջ գերազանցապէս կախած է այն բանից, թէ որ չափով իշխող կուսակցութիւնն իւրացնում է պետութեան ուժաւ և ոչ ցընորական շահերն ու պահանջները: Եւ բնական է, որ բօլշևիկներն ևս, ենթարկելով պատմութեան երկաթէ օրէնքներին, հարկադրւած պիտի լինէին թողնել իրենց իմբակցական նպատակները և պաշտպանել այն շահերը, որ առաջադրում է ռուս պետութիւնը, ընդառաջ գնալ այն պահանջներին, որ անում էր իշխանութեան՝ ռուս ժողովուրդը, ռուս ազգը:

Եւ ահա այսպէս ծայրայեղօրէն կօմսօպօլիտական (աշխարհաքաղաքացիական) կուսակցութիւնը դարձաւ իր էութեամբ մի ազգային ռուսական և նոյնիսկ ռուս իմպերիալիստական կուսակցութիւն:

Իշխանութիւնն ամրացնելու և Ռուսաստանի միջազգային դրութիւնը փրկելու համար էր, որ բօլշևիկները, երես դարձնելով իմպերիալիստական Արեւմուտքից, դիմեցին պանիսլամիստական Արեւելքին, այսինքն՝ Արեւելքի ամենայնատաղէմ և արիւնարբու ոյժի օգնութեան: Սա չէր խանգարում, որ այստեղ էլ պահպանւէր սօցիալիստական, կօմմունիստական ֆըրազէօլօգիան՝ սա չէր խանգարում, որ «կարմիր» նըշանաբանների և ֆրազների տակ թագնւէին ամենասեւ ձգտումներ:

Եւ այս աղաղակող հակասութիւնը ծածկելու համար, բօլշևիկները ստեղծեցին մի ամբողջ թէօրիա, որով նրանք ձգնում էին ապացուցել, թէ յեղափոխութիւնն ու սօցիալիզմը շատ աւելի նպաստաւոր հող ունեն արեւելեան յետամնաց երկրներում, քան արեւմուտքի կապիտալիստական երկրների մէջ: Այսպիսով բօլշևիկների կօմմունիզմը, որ սկզբում ձըգտում էր դէպի առաջ, դէպի աւելի կատարեալ տըն-

տեսակարգ, քան կապիտալիստականն է, իշաւ մինչև նախնական կօմմունիզմը, իր հայեացքն ուղղեց դէպի յետ, գնաց ամենաթոյլ դիմադրութեան ճանապարհով:

Սխալ պիտի լինէր բօլշևիկների մղուսը դէպի Արևելք բացատրել միայն քաղաքական նկատառումներով: Այստեղ անշուշտ խոշոր դեր են կատարում նաև սօցիալական մօտիւնները: Բօլշևիկական կօմմունիզմը, որ յետամնաց Ռուսիայում ի վերջոյ վերածւեց նախնական կօմմունիզմի, բնականաբար ամենից աւելի խոր արձագանգ պիտի գտնէր արևելեան յետամնաց երկրներում:

Ասա՛ ինձ՝ ո՞վ է քո ընկերը, և ես կասեմ՝ ո՞վ ես դու:

Եւ իրաւ. գերմանական պատերազմից, և անհամեմատ աւելի երեք տարւայ քաղաքացիական կռւից քայքայւած և իր տնտեսութեան ներկայ վիճակով մինչև 17րդ դարը յետ մղւած Ռուսաստանը, որին ըսպառնում է անխուսափելի վտանգ գաղութային վայր դառնալու եւրօպական ու ամերիկեան կապիտալիզմի համար, և մեռնող ու անդամահատւող թիւրքիան, — ո՞րքան նամանութիւն նրանց վիճակի մէջ: Տարբեր ծայրերից ելնելով և տարբեր նշանաբաններով. ռուս բօլշևիկները և թուրք միլլիճիները, իւրաքանչիւրն իր ժողովրդին յատուկ ձևերով ու մեթօդներով, կատարում են գերազանցապէս ազգային — պետական գործ:

Այո՛, ռուս բօլշևիկները բռնի ոյժով և դաւերով ձգտում են այսօր հաւաքել ցարերի ստեղծած հսկայ Ռուսաստանը, որի առաջ մի ժամանակ դողում էր ամբողջ աշխարհը, ճիշտ այնպէս, ինչպէս և թուրք միլլիճիները կամենում են վերականգնել կարմիր սուլթանների ստեղծած վաղեմի հզօր Օսմանեան կայսրութիւնը . . .

III

ԲՕԼՇԵԻԻԿՆԵՐԻ ԻՐԱԿԱՆ ՈՅԺՆ ՈՒ ԴԱՇՆԱԿԻՑՆԵՐԻ
ՔԱՂԱՔԱԿԱՆ ԽԱՂԵՐԸ

Նրանք, որ ծանօթ չեն բօլշևիկեան Ռուսաստանի ներքին վիճակին, տրամադիր են չափազանց գերագնահատելու բօլշևիկների ոյժը: Կարծում են, թէ դա իրապէս մի ահռելի ոյժ է, որ ի վիճակի է իր կամքը տիրաբար թելադրելու ամբողջ աշխարհին:

Իրական ոյժերի փոխյարաբերութեան այդքան միամիտ գնահատման մէջ անշուշտ խոշոր դեր են կատարում յաղթող մեծ պետութեանց երեւուն դիրքը բօլշևիկների հանդէպ, որ իրենք բօլշևիկները վախով են բացատրում, և բօլշևիկների ռազմական յաջողութիւնները ռուսական ներքին ճակատների վրա (Կօլչակ, Դենիկին): Մինչդեռ դաշնակիցներն իրօք երբէք չեն վախեցել բօլշևիկներից, այլ կամեցել են միայն նրանց մղած քաղաքացիական կռիւր հրահրել՝ թուլացնելու համար Ռուսաստանը եւ իրագործելու համար նախկին ռուսական կայսրութեան սահմաններում իրենց քաղաքական այն ծրագիրները, որ նրանք (գլխաւորապէս Անգլիան) առաջադրել են: Ճիշտ է, նրանք բացայայտօրէն օգնել են և Կօլչակին, և՛ Դենիկինին, և՛ բոլոր հակաբօլշևիկեան ոյժերին, բայց և միևնոյն ժամանակ իրենց քաղաքական դիւային խաղերով շատ էական օգնութիւն են հասցրել նաև բօլշևիկներին: Վերջինները, զգալով ու գիտակցելով, որ առանց դաշնակիցների հետ համաձայնութեան գալու, անկարելի է վերջ դնել քաղաքացիական կռիւն Ռուսաստանում, բազմաթիւ անգամներ դիմեցին նրանց և խոստացան ամեն տեսակի զիջումներ ու արտօնութիւններ, միայն թէ իրենց հանգիստ թողնեն: Եւ բօլշևիկների արևելեան քաղաքականութիւնը ու-

ըիշ բան չէ, եթէ ոչ միջոց սպառնալու դաշնակիցներին, որպէսզի սրանք վերջապէս ուշադրութեան առնեն բօլշևիկների դիմումները, ճանաչեն նրանց եւ հաշտութիւն կնքեն նրանց հետ: Ուրիշ խօսքով՝ բօլշևիկների արևելեան դաւերը միայն ապացոյց են նըրանց քաղաքական անզօրութեան՝ ու սնանկութեան:

Ով հետևել է բօլշևիկների դիւանագիտական ճիգերին, նա չէր կարող չնկատել, որ բօլշևիկների գերագոյն տենչանքն է արժանանալ վերջապէս հզօր պետութեանց ողորմածութեան: Եւ պէտք է քաղաքական մանուկ լինել կարծելու համար, որ դաշնակիցները չեն կարող, երբ որ կամենան, զսպել բօլշևիկներին և ստիպել նրանց կանգնելու այնտեղ, ուր որ իրենք կը մատնանչեն: Ռուսաստանի քաղաքացիական կռիւն այն բոլոր վայրկեաններին, երբ կռուող կողմերը ուժեղացել են աւելի, քան ցանկալի է եղել դաշնակիցներին, կամ սպառնացել են արդէն այն շրջաններին, որոնք քաղաքական մեծ կարևորութիւն են ունեցել դաշնակիցների համար, դաշնակիցները միշտ գտել են միջոցներ (կամ դիպլօմատիական խաղերով կամ նորանոր ճակատներ ստեղծելով) յաղթող ոյժի առաջն առնելու:

Բաւական է վերյիշել միայն պատերազմական իրադարձութեանց ընթացքը վերջին երկու տարւայ մէջ նախկին կայսրութեան սահմաններում, որպէս զի պարզ լինի այդ: Երբ անցեալ տարի աշնան Դենիկինի զօրքերը մօտենում էին Մօսկւային, թւում էր, թէ ամեն ինչ վերջացած է արդէն, թէ բօլշևիկների օրերը հաշւած են արդէն: Բայց յանկարծ, հիւսիսային Ֆրօնտը անգլիացիք թողին ու հեռացան, յանկարծ Մերձբալթեան ճակատում ինչ որ խորհրդաւոր անցքեր պատահեցին ի նպաստ բօլշևիկների, Լեհաստանն ու Ռումանիան, որոնք սկսել էին կռիւններ բօլշևիկ-

ների դէմ, յանկարծ կանգ առան անհասկանալի պատ-
ճառով և վերջապէս Դենիկինի յետևում, Ուկրայնա-
յում, երևացին զանազան ուժեղ պարտիզանական
խմբեր, որոնք կապ ունէին Պետլիւրայի հետ, իսկ
վերջինս պաշտպանւում էր դաշնակիցների կողմից:
Իսկ այս տարի, երբ բօլշևիկները, ընդհակառակը,
սկսեցին յաղթել իրենց թշնամիներին, նրանց յա-
ջողւեց ջախջախել Դենիկինին, և թւում էր արդէն
թէ ամեն ինչ վերջացած է, թէ բօլշևիկները իրերի
տէր են Ռուսաստանում, և թէ նրանց յաղթանակը
վերջապէս ապահովւած է:

Ի՞նչ չէին նաև մեզ մօտ այգալիսիք, որոնք հա-
ւատում էին, թէ մէկ երկու շաբաթ ևս, և բօլշևիկ-
եան հեղեղը հիւսիսից կհասնի մեր սահմանները: Եւ
Բագւի մէջ կատարւած բօլշևիկեան — տաճկական
Ֆարսը նոյնիսկ խուճապային տրամադրութիւն, առաջ
բերեց շատ շատերի մէջ: Արդէն կարծում էին, որ
հիւսիսի բօլշևիկեան զօրքերը մէկ երկու օրից յաղ-
թականօրէն կմտնեն նաև Հայաստան:

Բայց ո՞րքան դառն պէտք է լինի հիասթափու-
թիւնն այն բոլոր մոլորւած և բաղդախնդիր մարդ-
կանց, որոնք իրենց յոյսերը դրել են հիւսիսից գա-
լիք ոյժերի վրա: Եթէ իրաւ բօլշևիկեան զօրքերը
մտել են Բագու, նրանք չեն կարող այնտեղ շատ ու-
ժեղ լինել և, որ գլխաւորն է, երկար մնալ:


Ինչո՞ւ: Որովհետև վերջին մէկ երկու շաբաթւայ
ընթացքում բօլշևիկեան Ռուսաստանի քաղաքական
և ռազմական դրութիւնը կրկին այնքան վատթարա-
ցաւ որ բօլշևիկները չեն կարող մեծ զօրք տրամադրել
կովկասեան իրենց իսկական թէ քողարկւած գաղա-
փարակիցների աւանտիւրաների համար:

Լեհաստանը, որ երկար ժամանակ լուռ հանդի-
սատես էր բօլշևիկներին յետուառաջին և մատը մա-

ՕԿՏԻ

ԷԳԿ

A 81178



տին չխփեց Դենիկինին փրկելու համար վերջնական ջախջախումից, այսօր յանկարծ իր ամբողջ ուղմական թափով հրապարակ է եկել բօլշևիկեան Ռուսաստանի դէմ, որ արդէն միամտօրէն կարծում էր, թէ կարող է հանգստանալ վերջապէս և վայելել իր յաղթանակի պտուղները: Լեհաստանի հետ միացած է Ուկրայնան յանձին Պետլիւբայի կառավարութեան: Վերջինիս հետ միասին գործում է հռչակաւոր Մախնօն, որ ամենամահացու հարւածը հասցրեց անցեալ տարի Դենիկինին: Լեհական և ուկրայնական զօրքերը գրաւել են Կիևը և սպառնում են Օդեսային: Իսկ նրանց դաշնակից Մախնօն, արդէն մօտեցել է Խարկօվին: Ղրիմում կամաւորական բանակմնացորդները, վերակազմուելով գեներալ Վրանգելի գլխաւորութեամբ պատրաստւում են յարձակողականի անցնելու: Ֆինլանդիան, որ սկսել էր հաշտութեան բանակցութիւններ բօլշևիկներին հետ, յանկարծ այնպիսի անհաշտ դիրք բռնեց նրանց հանդէպ, որ բօլշևիկները ստիպւած հղան թողնել բանակցութեանց վայրը և ձեռնուհայն տուն վերադառնալ:

Այս բոլոր իրադարձութիւնները մեծ իրարանցում են առաջ բերել բօլշևիկներին աշխարհում: Եւ նորից ահազանգ է հնչում Մօսկւայից:

Վտանգն այնքան մեծ է բօլշևիկներին համար, որ վերջիններս հարկադրւած են ստեղծելու մի արտակարգ զինւորական խորհուրդ՝ կազմւած ցարակոն գեներալներից և նոյնիսկ մի ցարական նախարարից (Պօլիվանով): Աւելին, բօլշևիկները այս անգամ իրենց դիմակները վայր են նետել և յայտարարել թէ Ռուսաստանը ստիպւած է ազգային կռիւ մղել Լեհաստանի դէմ, որը կամենում է ռուսական շրջանները նւաճել:

Բօլշևիկներին դրութիւնը բնաւ ապահով չէ նաև Հիւսիսային Կովկասում, և կօզակներին մէջ վտանգա-

ւոր խմորումներ են նկատուում նորից բօլշևիկների դէմ:

Բայց բօլշևիկների դրուժիւնը ապահով չէ կարող լինել նոյնպէս և Ադրբէջանում ու Դաղստանում, որոնք Սօվետական, բօլշևիկեան գոյն ընդունելով, մեծ խոստումներ են ստացել բօլշևիկներից իրենց պանիսլամիստական մութ ծրագիրների իրագործման համար և որոնք դաժան յուսախաբուժիւն պիտի ունենան անտարակոյս, երբ տեսնեն, որ ոուս բօլշևիկները ոչ մի իրական օգնութիւն չեն տալիս նրանց, այլ միայն իւրացնում—տանում են Բագւի նաւթը դէպի հիւսիս միլիօնաւոր փթերով և փոխարէնը ոչինչ չեն տալիս ու չեն էլ կարող տալ: Եւ այն օրը, երբ դաշնակիցները կթելադրեն բօլշևիկներին հրաժարւել Բագւից՝ այդ գնով ձեռք բերելու համար հաշտութիւն, մի օր անգամ չի մնայ այնտեղ Սօվետական իշխանութիւնը:

Ինչո՞ւ: Որովհետեւ բօլշևիկների գերագոյն մտահոգութիւնն է փրկել իրենց դրուժիւնը բուն Ռուսաստանում: Այս նպատակի համար նրանք պատրաստ են շատ և շատ կարեւոր շահերից հրաժարւել:

Բօլշևիկների դրուժիւնը Ռուսաստանում այնքան խախուտ է ամեն տեսակէտով, և դաշնակիցների ըստեղծած նոր վտանգը Լեհաստանի, Ուկրայնայի, Մախնօյի, Ֆինլանդիայի, Վրանգելի և շուտով թերեւս նաև Ռումանիայի կողմից այնքան սպառնական է, որ բօլշևիկները, հակառակ իրենց բոլոր ցանկութիւններին՝ չեն կարող ագրեսիւ քաղաքականութիւն վարել ոչ հանդէպ դաշնակիցների և ոչ էլ հանդէպ այն բոլոր ազգային ոյժերի, որոնց յետևում կանգնած են դաշնակից պետութիւնները:

Դրա լաւագոյն ապացոյցն այն է, որ բօլշևիկները, որոնք այնքան անհաշտ և գրգռիչ նօտաներ էին

ուղարկում վրաստանին, ընդամենը մի ամիս առաջ, երբ լեհացիներն և ուկրայնացիք դեռ չէին սկսել իրենց ընդհանուր յարձակողականը Ռուսաստանի դէմ, այսօր, երբ վրաստանի հարեան Ադրբէջանը բոլշևիկեան է դառել, անհրաժեշտ են գտել հաշտութիւն կնքելու վրաստանի հետ, ճանաչել այդ երկրի անկախութիւնը և գէթ առժամանակ հրաժարուել նրաներքին գործերի մէջ խառնուելու յաւակնութիւններից:

Բայց միայն վերոյիշեալ իրադարձութիւնները չեն, որ ստիպում են բոլշևիկներին շտապել հաշտութիւն կնքելու ոչ միայն վրաստանի, այլ և բոլոր պետութեանց հետ: Պատճառները շատ աւելի խոր են:

IV

ՏՆՏԵՍԱԿԱՆ ՔԱՅՔԱՅՈՒՄԸ

Բոլշևիկեան Ռուսաստանի ամենավերաւոր, ամենավտանգաւոր և, ես պիտի ասեմ, ճակատագրական կողմը նրա տնտեսութիւնն է: Այդ տնտեսութիւնը գտնուում է այսօր, բառիս իսկական իմաստով, կատաստրոֆիկ վիճակի մէջ:

Եթէ կամենայինք փնտռել այդ օրհասական քայքայման պատճառները, պիտի գտնէինք, որ կան չորս գլխաւոր պատճառներ. ա. համաշխարհային պատերազմը, բ. բոլշևիկների սօցիալ-տնտեսական խելայեղ «էքսպերիմենտը», գ. գրեթէ երեք տարի անընդհատ շարունակուող քաղաքացիական կռիւը, որ միշտ բոլոր պատերազմներից ամենից աւելի արիւնոտն ու կործանարարն է լինում, և վերջապէս, դ. այն պաշարման վիճակը, որին ենթարկւած է բոլշևիկեան Ռուսիան դաշնակից պետութիւնների կողմից:

Առաջին պատճառը կատարել էր իր քայքայիչ գործը անկախ բոլշևիկների կամքից և մի տխուր ժառանգութիւն էր նրանց համար: Բայց մնացած երեք

պատճառներն ամբողջովին հետեանք են բօլշևիկներին
ներգործօն քաղաքականութեան :

Սօսենք նախ բօլշևիկներին տխրահռչակ սօցիալ
տնտեսական էքսպերիմենտի մասին, որի միջոցով նը-
րանք կարծում էին, թէ պիտի իրականացնեն անմի-
ջապէս սօցիալիստական կարգերը Ռուսաստանում և
իրենց «բարի» օրինակով վարակեն համայն աշխարհը :

Երբ տեղի ունեցաւ գերմանական յեղափոխու-
թիւնը, տապալուեց իւնկերներին կառավարութիւնը և
իշխանութեան գլուխը անցան գերմանական սօցիա-
լիստները, որոնց կազմակերպութիւնն ամբողջ երկրա-
գնդի վրայ ամենամեծն է և ամենակուռը, սրանք ոչ
մի հնարաւորութիւն չգտան անմիջապէս սօցիալիստա-
կան յեղաշրջում մտցնելու իրենց երկրում : Թւում էր
թէ, եթէ, իրաւ, կայ մի երկիր, որ հասունացած է
սօցիալիստական կարգերի համար, ամենից առաջ այդ
պիտի լինէր Գերմանիան, որի ազգաբնակչութեան եր-
կու երրորդ մասը կազմում է բանւորութիւնը : Մա-
նաւանդ, որ չկար սօցիալիստօրէն աւելի գիտակից,
աւելի կարգապահ, աւելի աշխատասէր և սօցիալա-
կան զգացումի տէր և քաղաքականապէս մարզւած մի
բանւորութիւն, քան գերմանականն էր, որի հսկայա-
կան կազմակերպութիւնները հիացմունք էին առաջ
բերում ամբողջ աշխարհում, նոյնիսկ թշնամի բանա-
կում :

Բայց ի՞նչ պատահեց : Գերման բանւորութեան
մեծագոյն մասի ներկայացուցիչները, որոնց ձեռքն
անցել էր ամբողջ իշխանութիւնը և որոնք ամենա-
լայն հնարաւորութիւններն ունէին իրագործելու ի-
րենց սօցիալիստական ձգտումները, քննելով Գերման-
իայի տնտեսութեան վիճակը՝ եկան այն եզրակացու-
թեան, թէ փորձ անել սօցիալիստական կարգեր մըտ-
ցնելու մի այնպիսի ժամանակ, երբ երկրի ամբողջ

տնտեսութիւնը քայքայւած է համաշխարհային պատերազմի պատճառով, նշանակում է նախօրօք անյաջողութեան դատապարտել այն և միանգամայն վարկաբեկել սօցիալիզմի գաղափարը լայն մասսաների մէջ:

Եւ եթէ Գերմանիայի պէս մի պետութեան մէջ իշխող սօցիալիստական կազմակերպութիւնները ներկայացուցիչները ներկայ պայմաններում վտանգաւոր համարեցին սօցիալիզմի անմիջական իրականացումը, ապա ի՞նչ խօսք կարող էր լինել իր ազգաբնակչութեան ճնշող մեծամասնութեամբ դիւղացիական Ռուսաստանի մասին, որի մէջ ոչ մի լուրջ առարկայական (օրիելտիւ) նախապայման չկար սօցիալիստական յեղաշրջման համար մանաւանդ, որ պատերազմը զգալի հարւածներ էր հասցրել նոյնիսկ այն փոքրիկ կապիտալիստական օջախներին, որոնք այնքան դժւարութեամբ ստեղծել էին ցարական կառավարութեան հովանու տակ մի քանի տասնեակ տարիները ընթացքում:

Չնայելով դրան, բօլշևիկները՝ առանց երկար ու թորակ մտածելու՝ որոշեցին մի ծանր փորձ, «սօցիալիստական էքսպերեմենտ» անել իրենց դժբաղդ երկրի գլխին և մի լաւ դաս տալ «ճահճացած» Արեւմուտքի հաստագլուխ սօցիալիստներին, թէև վերջիններից էին նրանք իւրացրել սօցիալիզմի տարրական հիմունքները:

Կապիտալիստական դասի ձեռքից աննախնթաց բռնութիւններով խլեցին արդարութեան բոլոր միջոցները եւ ամբողջ տնտեսութեան ղեկավարութիւնը յանձնեցին ընչազուրկ տարրերին թէ քաղաքներում և թէ գիւղերում: Հետևանքն եղաւ այն, որ մարդիկ, որոնք իրենց հոգեբանութեամբ դեռ ստրուկներ էին, ծոյլ և տգէտ, փոխանակ զարկ տալու արտագրու-

թեան, գերադասեցին սպառել այն, ինչ որ հեշտութեամբ ընկնում էր նրանց ձեռքը: Ինչո՞ւ աշխատել, քանի որ կարելի է վայելիլ: Երէկ ուրիշներն («բուրժուաներն») էին վայելում, այսօր էլ մենք կը վայելենք, — այս էր իշխող մտայնութիւնն այն բոլոր հողագուրկ և տգէտ մասսաների, որոնք գնում էին բօլշևիկների յետևից:

Իրենց իշխանութիւնն ամրապնդելու գերագոյն մտահոգութեամբ տարւած՝ նրանք հարկադրւած էին յագուրդ տալ ամբոխի ամենաստոր ընտանիքներին ու ախորժակներին: Այդ կազմակերպւած թէ անկազմակերպ թալանի հետևանքով աշխատանքի արտադրողականութիւնը ընկաւ չտեսնւած չափերով թէ քաղաքում և թէ գիւղերում: Բազմաթիւ գործարաններ կամ բնաւ ոչինչ կամ գրթէ ոչինչ չէին արտադրում, թէև նրանք ունէին բազմահազար բանւորներ, որոնք ապրուստի միջոցներ և թալանի հնարաւորութիւններ էին ստանում բօլշևիկեան կառավարութիւնից: Այդ բանւորները հետզհետէ կազմեցին մի արտօնեսալ դասակարգ, որ շատ խոշոր ծառայութիւն էր մատուցանում բօլշևիկներին, դառնալով յենարան նրանց միահեծան տիրապետութեան համար:

Գիւղում այդ տիպի բանւորների դերը կատարում էին ընչազուրկ, աղքատ գիւղացիները (այսպէս կոչւած) որոնց քմահաճոյքին էին յանձնել բօլշևիկները մնացած գիւղացիների (այսինքն՝ նրանց ճնշող մեծամասնութեան) ոչ միայն գոյքը, այլ և կեանքը: Այս հողի վրա ծագեցին զարհուրելի արիւնհեղութիւններ, ջարդեր և պօգրօմներ հսկայական տարածութիւնների վրա: Հողատէր, բայց աշխատաւոր գիւղացիութիւնը ցոյց տւեց այնպիսի հերոսական դիմադրութիւն բօլշևիկներին և նրանց հովանաւորած «աղքատներին», որ Լենինը ի վերջոյ ստիպւած եղաւ, իր իշխանու-

թիւնը չկորցնելու համար, զիջել աշխատաւոր գիւղա-
ցիութեան: Նոյնօրինակ զիջումներ նա հարկադրուեց
անել և քաղաքում մանր բուրժուազիային:

Եթէ սակայն այդ նահանջը փրկեց բօլշևիկներին
քաղաքականապէս, բայց նա չէր կարող զգալի կեր-
պով բարեփոխել երկրի տնտեսական վիճակը: Որով-
հետև բօլշևիկները չունէին քաղաքացիական քաջու-
թիւն իսպառ հրաժարուելու իրենց էքսպերիմենտների
քաղաքականութիւնից և բաւականանում էին տնտե-
սական կարկատաններով, որոնց գլխաւոր դրդապատ-
ճառը՝ իշխանութիւնն ամեն գնով իրենց ձեռքը պա-
հելու մտահոգութիւնն էր:

Չանագան «սօցիալիզացիաների, նացիօնալիզա-
ցիաների և մուսիցիպալիզացիաների» էքսպերիմենտ-
ները, փորձերը հիմնովին քայքայեցին Ռուսաստանի
տնտեսութիւնը թէ գիւղում և թէ քաղաքում: Այդ
քայքայումն այնքան աղաղակող էր և բօլշևիկների
մղած քաղաքացիական կռւի պահանջներն այնքան էին
հրամայական, որ իրենք՝ բօլշևիկները աստիճանաբար
սկսեցին դիմել այնպիսի միջոցների, որոնք տրամա-
գծօրէն հակառակ էին նրանց քարոզած նախկին գա-
ղափարներին: Զրկեցին նոյնիսկ բանւորներին իրենց
դասակարգային շահերը պաշտպանելու գրեթէ բոլոր
իրաւունքներից:

Սպառնալիքներով և ցինիկ խաբեքայութիւննե-
րով, որոնք միշտ ամենավարպետ կերպով քօղարկւում
են սօցիալիստական, կօմմունիստական կեղծ պատճա-
ռաբանութիւններով, 8 ժամեայ բանւորական օրը,
որի համար նրանք ժամանակին այնքան գլուխ էին
պատռել, դարձրին 10—12 ժամեայ բանւորական օր:
Սկսեցին շահագործել բանւորների աշխատանքը և
կիրակի ու տօն օրերին:

Նոյնիսկ Մայիսի մէկը, որ աշխատաւորութեան

տօնն է և հանգստի օր, դարձրին 10—12 ժամեայ աշխատանքի օր: Մտցրին աշխատանքի ստիպողական ընդհանուր ծառայութիւն, որ իր խստութեամբ շատ քիչ է տարբերուում զինւորական ծառայութիւնից: Մի խօսքով՝ մտցրին տնտեսական մի սիստեմ, որի նմանը կարելի է գտնել միայն հին դարերում, փարաւոնների և ուրիշ արեւելեան բռնապետների մօտ կամ հռօմէական կայսրութեան օրերում, և որը ոչ մի առնչութիւն չի կարող ունենալ աշխատանքը և աշխատաւորութիւնը ազատագրելու կոչւած սօցիալիզմի հետ:

Այսպիսով բօլշևիկները իրենց ասիական սօցիալիզմով և ասիական բռնութիւններով ու մեթօդներով մի նոր, աւելի լաւ տնտեսակարգ չստեղծեցին, այլ գահավիժելով հասան մինչև հին դարերը և տնտեսութեան ասիական սիստեմները:

Սա մի աւելորդ ապացոյց է, որ բօլշևիզմն իր նշանաբաններով ու ֆրազներով է միայն առաջդիմական շարժում, մինչդեռ իր էութեամբ անտարակուսելիօրէն յետադիմական և հակայեղափոխական է: Որովհետև նա չէ յեղափոխականը, որ ամենից աւելի «թունդ» յեղափոխական ֆրազներով ու նշանաբաններով է հրապարակ գալիս, այլ նա, որի գործերը յեղափոխական արդիւնքներ են տալիս: Բօլշևիկներն իրենց իսկ ձեռքով տանում են Ռուսաստանը դէպի բէակցիա, դէպի գաղութային ստրկացում և միահեծան բռնապետութիւն:

Ռուսաստանի ներկայ տնտեսական կատաստրօֆն առաջ բերելու մէջ ահագին դեր կատարեց նաև գրեթէ հրեք տարի տևող քաղաքացիական կռիւը, որ ամենից առաջ մահացու հարւած հասցրեց հաղորդակցութեան, փոխադրութեան միջոցներին: Շոգեկառքերը (պարօվօզները)՝ փչացած, վագոնները՝ ջարդուած, ճանապարհները քանդուած, կամուրջները՝ օդը ցնդած,

— ահա պատկերը ուսուսական արդի երկաթուղիների, Ռեկվիզիցիաների շնորհիւ և հազար ու մի այլ պատճառներով գիւղերում անասունների թիւը այն աստիճան ընկաւ, որ գիւղացին, եթէ անգամ շատ հող ունենայ և կամենայ մշակել իր ամբողջ հողը, անասունների բացակայութեան կամ պակասութեան պատճառով չպիտի կարողանայ շատ բան անել: Այն՝ ինչ որ մնացած էր «աղքատ» գիւղացիների «սօցիալիստական» գործունէութիւնից, ալան թալանի ու ոչնչացման ենթարկւեց գրեթէ բոլոր ամենաբարեբեր նահանգներում քաղաքացիական կռիւ անվերջ յետուառաջների ժամանակ:

Վերջապէս, բօլշևիկեան Ռուսաստանի ծովապաշարման վիճակը լրացրեց երկրի տնտեսական աւերման պատկերը:

Բօլշևիկներն իրենք էլ շուտով գլխի ընկան, որ առանց եւրոպական ու ամերիկեան մեքենաների, կապիտալի՝ Ռուսաստանը «չ մի դէպքում չպիտի կարողանայ վերականգնել իր հաղորդակցութեան միջոցները, իսկ առանց հաղորդակցութեան միջոցների վերականգնման՝ անկարելի պիտի լինի առհասարակ ոտի կանգնեցնել Ռուսաստանի մեռնող տնտեսութիւնը:

Բօլշևիկները հասկացան նոյնպէս, որ առանց կապիտալիստական երկիրների ապրանքների՝ անկարելի պիտի լինի բաւարարել լայնածաւալ երկրի միլլիոնաւոր կարիքները:

Ահա թէ ի՞նչու հաշտութիւնը կապիտալիստական Եւրոպայի ու Ամերիկայի հետ դասել է այսօր Ռուսաստանի ամենաաղաղակող եւ ամենահրամայական պահանջը: Բօլշևիկների գոյութեան հարցը մեծապէս կախւած է այն բանից, թէ ո՞րքան շուտ և որքան յաջող կերպով նրանք պիտի կարողանան հաշտութիւն կնքել կապիտալիստական հզօր երկիրների հետ: Բօլ-

չեիկների բաղդի բանալին այսօր ամբողջովին գտնու-
ւում է դաշնակից պետութեանց ձեռքում :

Եւ բօլշևիզմը, պատմութեան երկաթէ տնհրա-
ժեշտութեամբ և անխուսափելիութեամբ, պիտի ջախ-
ջախուի ու ճզմուի, եթէ նա գլուխ չխոնարհէ կապի-
տալիստական աշխարհի առաջ և չհրաժարուի իր կոր-
ծանարար ցնորքներից և էքսպերիմենտներից :

V

ԻՆՉ Է ՍՕՑԻԱԼԻԶՄԸ

Բօլշևիզմը, Ֆրազէոլոգիան սօցիալիստական է,
բայց նրա էութիւնը և պայքարի մեթոդները միան-
գամայն հակառակ ժամանակակից գիտական սօցիալիզ-
մին : Բօլշևիզմը սպառնողական սօցիալիզմ է, նախ-
նական կօմմունիզմ : Նրա իդեալի իրական ազրիւրը
ոչ թէ ապագան է, այլ անցեալը, ոչ թէ առաջդէմ
Եւրոպան է, այլ յետադէմ Ասիան :

Բայց ի՞նչ է սօցիալիզմը :

Սօցիալիզմն ամենից առաջ և գերազանցապէս ա-
ւելի բարձր, աւելի կատարեալ սնտեսակարգ է, քան
այն կապիտալիստականը, որ տիրում է այսօր աշ-
խարհիս ամենակուլտուրական և ամենաերջանիկ եր-
կրներում (Անգլիա, Ամերիկա, Գերմանիա և այլն) : Որ-
ևէ տնտեսակարգի բարձրութիւնը և առաւելութիւնը
կարելի է չափել ւածխահանքի արտադրողականութեան
ասիճանով : Առայժմ մարդկութիւնը չի կարողացել
ստեղծել աւելի բարձր տնտեսութիւն, քան այն, որ
գոյութիւն ունի այսօր կապիտալիստական կոչւած
պետութեանց մէջ : Ինչո՞ւ : Որովհետեւ կապիտալիս-
տական խոշոր տնտեսութեան մէջ է յաջողուել բարձ-
րացնել աշխատանքի արտադրողականութիւնն այն
աստիճան, որին չէ հասել և ոչ մի այլ տեսակի տըն-

տեսութիւն : Իսկ կապիտալիստական խոշոր տնտեսութեան մէջ ամենամեծ դերը կատարում են արտադրութեան միջոցները, այսպէս կոչւած մնայուն կապիտալը : Արտադրութեան այն միջոցները, որոնք գիտութեան և տեխնիքայի վերջին խօսքն են ներկայացնում, — հսկայական մեքենաները, շոգեշարժները, էլէքտրաշարժները և նորագոյն կատարելագործւած գործիքները, որոնք ուրիշ, աւելի յետամնաց տնտեսութիւններին անմատչելի են, շատ խոշոր չափերով բարձրացընում են մարդու աշխատանքի արդիւնաւէտութիւնը :

Միւս կողմից՝ աշխատանքը մեծ կապիտալիստական գործարանների մէջ, այդպիսի մեքենաների ու գործիքների վրա, հիմնովին փոխում է աշխատաւորի հոգեբանութիւնը : Դարձնում է նրան անհամեմատ աւելի կարգապահ, ուշիմ, տոկուն, աւելի վարժ, աւելի ինտելիգենտ և ուժեղ, ու մեծապէս զարկ է տալիս նրա սօցիալական զգացումների զարգացման :

Այդպիսի բանւորների աշխատանքը բնականաբար պիտի լինի զգալիօրէն աւելի արդիւնաւէտ, քան այն բանւորներինը, որոնք աշխատում են նահապետական պայմանների մէջ :

Այսպիսով կապիտալիզմը, կապիտալիստական խոշոր տնտեսութիւնը ստեղծում է թէ առարկայական (մեքենաներ և այլն), թէ ենթակայական (հոգեբանական) պայմաններ, որոնք մեծ չափով բարձրացնում են աշխատանքի արտադրողականութեան, արդիւնաւէտութեան աստիճանը : Անգլիայում, ուր կապիտալիզմը ամենահինն է և ամենից բարձրը, բանւորը, նոյնքան ժամանակի ընթացքում արտադրում է 2—3 անգամ աւելի, քան ռուս բանւորը, որ աշխատում է աւելի յետամնաց միջոցներով և նահապետական պայմաններում : Իսկ նայ բանւորը անտարակոյս արտա-

դրում է մէկ ու կէս անգամ աւելի նւազ, քան ռուս
բանւորը :

Միամտութիւն է կարծել, թէ մարդկանց քմահա-
ճոյքից է կախւած տնտեսութեան մի ձևից մի աւելի
բարձր ձևի անցնելը : Պէտք է, որ կատարւի տնտե-
սական մի մեծ պրոցես, որի ընթացքում հիմնովին
փոխւի տնտեսութեան բովանդակութիւնը, որպէսզի
հնարաւոր լինի փոխել տնտեսութեան ձելը : Կապի-
տալիստական տնտեսութեան ծոցում տեղի է ունե-
նում դանդաղօրէն, յարաճունօրէն կազմաւորումն այն
բարձր սօցիալիստական տնտեսութեան, որը մի օր,
փոխելով միայն իր ձելը, իր երևոյթը, պիտի փոխա-
րինէ կապիտալիստականը :

Վերցնենք կապիտալիզմի մայր երկիրը՝ Անգլիան
և տեսնենք, թէ ի՞նչ առաւելութիւններ կարող է տալ
այնտեղ սօցիալիզմի իրականացումը բանւոր դասի
համար, որ կազմում է ազգաբնակչութեան երկու եր-
րորդական մասից աւելի : Նախ և առաջ այնտեղ կայ
երկար ժամանակի ընթացքում ստեղծւած մի հսկայա-
կան կապիտալ, որ ծառայում է իբրև արտադրութեան
միջոց Անգլիայի վիթխարի գործարանների մէջ : Այդ
կապիտալը գերազանցապէս արդիւնաբերող կապիտալ
է և ոչ թէ վաշխառուական կամ առևտրական :

Երբ աշխատանքի արդիւնաւէտութեան աստիճա-
նը շատ բարձր է, կապիտալիստի շահն էլ մեծ է. և
այդ շահի միջոցով է, որ նա դիզում է իր ահռելի հա-
րըստութիւնները, որոնք իրենց հերթին դառնում են
կապիտալ, մտնելով արդիւնաբերութեան մէջ և ըն-
դարձակելով արդիւնաբերութիւնը :

Եւ քանի որ Անգլիայի հարստութեան մեծագոյն
մասը նրա արդիւնաբերական կապիտալն ու նրա ար-
տադրութեան միջոցներն են, սօցիալիստական յեղա-

չըջման դէպքում այդ կապիտալն ու արտադրութեան այդ միջոցներն են, որ պիտի ենթարկեն պետականացման, սօցիալիզացիայի :

Այդ դէպքում որևէ տնտեսական փոփոխութիւն կ'ատցնուի :

Բնաւ :

Փոփոխութիւնը կ'լինի սօցիալական և իրաւական : Կապիտալիստական դասը կորցնում է իր կապիտալը և զրկւում է հնարաւորութիւնից շարունակելու աշխատանքի շահագործումը : Կապիտալը, արտադրութեան բոլոր միջոցները դառնում են պետութեան սեփականութիւն, և աշխատաւորն իր վաստակը ստանում է ամբողջութեամբ, ու ոչ մի յաւելեալ աշխատանք չի մտնում այլևս կապիտալիստի գրպանը՝ իբրև շահ : Արտադրութեան միջոցները այժմ արդէն ծառայում են ամբողջ աշխատաւորութեան և ոչ թէ միայն մի փոքրաթիւ շահագործող դասի :

Այսպիսի մի յեղաշրջում Անգլիայի պէս մի խոշոր կապիտալիստական երկրում իսկապէս կարող է ձեռնտու լինել բանւորական մեծամասնութեան համար : Տնտեսական վիթխարի մեքենան, մի շարք բարեփոխումներով, կը շարունակէ գործել և, մի փոքր գասի անչափելի հարստացման փոխարէն, հաւասարապէս կ'հարստանայ և կապահովւի ամբողջ աշխատաւոր ժողովուրդը, անհամեմատ աւելի արդիւնաւէտ կերպով, քան մինչ այդ, որովհետև նա այժմ պիտի ստանայ իր ամբողջ վաստակը :

VI

ԲՕԼՇԵԻԻՉՄԻ ՏՆՏԵՍԱԿԱՆ ՀԵՏԵԻԱՆՔՆԵՐԸ

Վերցնենք այժմ Հայաստանը և տեսնենք, թէ ի՞նչ տնտեսական հետեանքներ կարող է տալ սօցիալիս-

տական հասարակարգի անմիջական հաստատման փորձը մեր երկրում:

Հայաստանում արդիւնաբերական խոշոր կապիտալ չկայ բնաւ:

Հայ ժողովուրդը եթէ ունի մի փոքրաթիւ կապիտալիստական դաս, նա էլ գտնւում է Հայաստանի սահմաններից դուրս՝ վրաստանում, Ադրբէյջանում, Ռուսաստանում, Պօլսում, Իզմիրում, Եգիպտոսում և այլուր: Այդ դասը սեփականագուրկ անել մենք չենք կարող. հետևաբար չենք կարող խլել նրանց ձեռքից նրա արտադրութեան մեծարժէք միջոցները:

Իսկ Հայաստանի ներսում եղած կապիտալը վաշխառուական է և առևտրական գերազանցապէս: Այդ կապիտալը—ապրանքներ, դրամ—մեծ չէ, և հեշտ է յափշտակել այն, բայց աւելի ևս հեշտ է սպառել այն:

Սակայն ի՞նչ կշահի դրանից մեր աշխատաւորութիւնը և մեր երկիրը:

Ռուսաստանի բօլշևիկեան փորձը ցոյց տւեց, որ պատրաստի ապրանքներն ու մասնաւոր մարդկանց մօտ եղած դրամը, սօցիալիզացիայի դէպքում, ընկնում է այն մարդկանց ձեռքը, որոնք զէնք ունեն և ճարպիկ ու աւագակ են: Իսկ մնացած չնչին մասն էլ հալւում է զանազան «սովետական» կոչւած խանութներում:

Հետևաբար ի՞նչ պիտի ընկնի հայ աշխատաւորութեան ձեռքը: Գիւղերում—ոչինչ: Իսկ քաղաքներում շատ և շատ չնչին բան, որ նա կսպառէ ամենաշատը մէկ ամսւայ ընթացքում:

Յետո՞յ: Յետոյ—նրա դրութիւնն աւելի ևս կը վատթարանայ և նոյն իսկ անյուսալի կգառնայ: Ինչո՞ւ: Որովհետև մեր երկրում չկայ արգիւնաբերական կապիտալ, որ կարելի լինէր սօցիալիզացիայի ենթարկել և որի միջոցով հնարաւոր լինէր հիմնապէս բարելաւել, բարձրացնել աշխատաւորութեան տնտեսա-

կան վիճակը ու ստեղծել իսկապէս սօցիալիստական կարգեր: Տնտեսական տեսակէտով մինք առնւազը մէկ երկու դար յետ ենք մնացել ժամանակակից Անգլիայից:

Մեր երկիրը ոչ միայն զուրկ է սօցիալիստական տնտեսակարգի գլխաւոր նախապայմանից՝ արգիւնաբերական կապիտալից, այլ նա շունի նոյն իսկ բաւականաչափ դրամագլուխ, որպէսզի իր սեփական միջոցներով վերականգնի աւերւած տնտեսութիւնները, ոտքի կանգնեցնի հարիւր հազարաւոր գաղթականներին, որոնք՝ թալանւած ու անօթի՝ սպասում են այն երջանիկ օրւան, երբ հնարաւորութիւն կստանար վերադառնալ իրենց բնակավայրերը: Եւ որպէսզի կարելի լինի այդ ընչազուրկ գիւղացիական մասսաները վերաբնակեցնել իրենց տեղերում և ստեղծել նրանց համար տնտեսութիւն, պէտք է ամենից առաջ ունենալ մեծ դրամագլուխ:

Եթէ Հայաստանում լինի «սովետական» կոչւած բօլշևիկեան իշխանութիւն, որը իբր թէ պիտի ստեղծէ անյապաղ «սօցիալիստական դրախտ», ի՞նչ միջոցներով նա պիտի կարողանայ լուծել մեր երկրի ամենացաւոտ հարցերից մէկը—գաղթականական հարցը: Ո՞վ է տալու հայ բօլշևիկներին այն հսկայական դրամագլուխը, որով նրանք կարողանան պահել գաղթականներին, որբերին, հնարաւորութեան դէպքում, տեղափոխել իրենց բնակավայրերն և վերականգնել նրանց աւերւած տնտեսութիւնը: Ո՞րտեղից պիտի գտնեն մեր տնաբոյս բօլշևիկներն այն մեծ կապիտալը, որով նրանք ի վիճակի լինեն ձեռք բերել մեր քայքայւած գիւղացիութեան համար լծկաններ, գիւղատնտեսական գործիքներ և այլն: Արդէն ամերիկական յանձնախումբը, որ եկել էր մեծ գումարով Ալէքսանդրապօլի շրջանը հայ գիւղացիների համար լծկաններ գնելու համար, բօլշևիկեան խլրտումներից

յետոյ մեկնել է Հայաստանի սահմաններից, յայտնելով որ լծկաններ չի գնի, որովհետև ինչի կամենում, որ այդ լծկաններն ընկնեն բօլշեւիկների ձեռքը:

Որտեղից պիտի ստանան հայ բօլշեւիկ կոչւածները այն խոշոր կապիտալը, որով կարելի լինի կարգի բերել մեր քայքայւած հաղորդակցութեան միջոցները. մեզ պէտք են շոգեկառքեր, վագօններ, ատոմօբիլներ, ռեւիսներ և այլն, մեզ պէտք են այդ բոլորը ոչ միայն եղած ճանապարհները վերականգնելու եւ բաւարար վիճակի մէջ դնելու համար. այլ մեզ պէտք են այդ բոլորը նոր երկաթուղիներ շինելու, նոր ճանապարհներ անցկացնելու համար:

Առանց հաղորդակցութեան միջոցների բարելաւման անհնար պիտի լինի վերաշինել մեր աւերւած երկիրը, մեր քայքայւած տնտեսութիւնները:

Բօլշեւիկները պիտի խաբեն ձեզ ասելով, թէ ամեն ինչ, որ պէտք է հայ ժողովրդին եւ Հայաստանին, կարող է տալ եւ կտայ Ռուսաստանը: Բայց բօլշեւիկեան Ռուսաստանը, եթէ ի վիճակի լինէր որեւէ բան մեզ տալու, ամենից առաջ իր հիւանդ գլխի ճարը պիտի տեսնէր: Մենք գիտենք, որ բօլշեւիկեան Ռուսաստանը նոյնքան կարօտ է բուժման եւ խընամքի, որքան եւ Հայաստանը: Նա ոչ միայն չի կարող տալ մեզ արտադրութեան միջոցներ, այլ եւ հաց, որով այնքան հարուստ էր նա առաջ եւ որի պակասութիւնից այնքան նա տառապում է այսօր: Մենք գիտենք, որ բօլշեւիկեան Ռուսաստանը սովից է մեռնում այսօր:

Սպասել օգնութիւն մի, թէկուզ, շատ ընդարձակածաւալ պետութիւնից, որ ինքը դրսի օգնութեան աղաղակող կարիք է զգում, նշանակում է ապրել ցընորքներով կամ միամիտներին ու կոյրերին խաբելու համար ստել անամօթաբար:

Բօլշևիկեան Ռուսաստանը ուրիշ երկրներին միայն մի բան ունի տալու—իր վարակիչ թոյնը, իր ախտաւոր մտայնութիւնը, իր ազգակործան ցնորքը, իր վիժած սօցիալական փորձերը: Եւ այս բոլորից ալեան, սովի և համաճարակ հիւանդութեանց մահասարսուռ հոտն է փչում: Այս բոլորը մեզ խոստանում է կատարեալ բնաջնջում:

Եթէ բօլշևիկեան Ռուսաստանից բօլշևիկեան Հայաստանը ոչինչ չպիտի կարողանայ ստանալ, թերևս լինի մէկ ուրիշ երկիր, որ ընդառաջ գնայ մեր մանկամիտ սօցիալիստական փրկիչներին, հայ բօլշևիկներին: Կապիտալիստական բոլոր երկիրների համար բօլշևիզմը հաւասարազօր է ժանդախտին: Այն երկիրը, որ բռնւած է այդ սարսափելի հիւանդութեամբ, անմիջապէս կտրւում է ամբողջ աշխարհից, որպէսզի չըկարողանայ վարակել ուրիշ առողջ երկիրները: Այդպէս վարւեցին Ռուսաստանի հետ, այդպէս էլ անկասկած կվարւին Հայաստանի հետ:

Այն միակ կապիտալիստական հզօր պետութիւնը, որ իր առատ օգնութեամբ փրկեց մեզ սովից, նա ևս պիտի դադարի Հայաստան որևէ մթերք ուղարկելուց: Բօլշևիկեան անկարգութեանց ուրւականն անգամ ըստիպեց Ամերիկայի ներկայացուցիչներին շտապել թողնելու մեր երկրի սահմանները: Երևակայում էք, թէ ի՞նչ պիտի լինէր, երբ իրօք այստեղ բօլշևիկեան յեղաշրջում կատարւէր: Այլևս ոչ մի ամերիկացի չէր մնայ այստեղ և ոչ մի փութ ալիւր չպիտի գար: Ողորմելի բօլշևիկ կօմիսարները կարծել են, թէ ապահովում են իրօք Հայաստանի հացը, երբ բռնի ուժով ստորագրութիւն են վերցրել Ալէքսանդրապօլում մեր երկրից հեռացող ամերիկացի պաշտօնեաներից ու տիկիներէրից. հաւատացել են կամ կամեցել են հաւատացընել, թէ Ամերիկան պիտի շարունակէ հաց ուղարկել

Հայաստանին, եթէ նոյնիսկ բօլշևիկեան իշխանութիւն լինի Հայաստանում:

Չգիտես ի՞նչ կայ այստեղ աւելի—միամտութիւն թէ նենգամիտ խուժանավարութիւն, ի՞րենք են յիմար թէ ուրիշներին են կամենում յիմարացնել, խարբել:

Պէտք է մանուկ լինել չհասկանալու համար, թէ մի ստորագրաս պաշտօնեայի ստորագրութիւնը այնպիսի խոստման տակ, որի տալը նրա լիազօրութիւնից չատ վեր է, ոչ մի արժէք չունի իր բարձր իշխանութեան համար: Այդպիսի ստորագրութիւնից, այն էլ սպառնալիքի տակ տրւած, ոչ մի պարտաւորութիւն չի կարող ծագել:

Այսպիսով բօլշևիկեան իշխանութիւնը մեր երկրում ոչ միայն անխուսափելիօրէն մահացու հարւած պիտի հասցնէ մեր ժողովրդի տնտեսութեան, այլ և պիտի զրկէ մեր ժողովուրդը և այն հացից, որ նա ստանում էր մինչև այսօր Ամերիկայից:

Այս կլինի տնտեսական անմիջական հետևանքը բօլշևիկեան «սօցիալիստական» թաւանտիւրայի Հայաստանում: Իսկ թէ ի՞նչ կլինեն մի այդպիսի յանցաւոր աւանտիւրայի սօցիալական և քաղաքական հետևանքները, դրա մասին յաջորդ գլուխներում:

VII

ԲՕԼՇԵՒԻԶՄԻ ՍՈՑԻԱԼԱԿԱՆ ՀԵՏԵՒԱՆՔՆԵՐԸ

Սօցիալիստական յեղաշրջում նշանակում է ընդհանուր սեփականազրկում յօգուտ պետութեան կամ համայնքի: Ոչ միայն արտագրութեան միջոցները, այլ և տները, խանութները, ապրանքները, և ամբողջ մասնաւոր սեփականութիւնը պիտի դառնայ պետական կամ համայնական սեփականութիւն: Դասակար-

գերը պիտի վերացեն, և ամբողջ ժողովուրդը պիտի հաւասարւի սօցիալապէս, կազմելով աշխատաւորական մի բանակ: Բոլորի աշխատանքի արդիւնքը պիտի պատկանէ պետութեան կամ համայքին, և ամեն մի քաղաքացի աշխատաւոր իր վարձը պիտի ստանայ պետութիւնից կամ համայնքից:

Մինք տեսանք, որ մի այդպիսի յեղաշրջում ներկայումս Հայաստանում տնտեսական տեսակէտով ոչ միայն չի կարող տալ որեւէ դրական արդիւնք, այլ ընդհակառակը կունենայ ամենավատթար հետեւանքները: Մեր ժողովրդի աշխատանքի արդիւնաւէտութեան աստիճանը այնքան է ցածր, մեր ժողովրդի արտադրութեան միջոցներն այնքան են պրիմիտիւ, նախնական, որ նա չի կարող ունէ բան շահել համայնացումից, սօցիալիզացիայից: Ոչ մի պետական իշխանութիւն ի վիճակի չէ, վերելից հրամաններ արձակելով, հիմնովին շրջել մի ամբողջ ժողովրդի տնտեսական կեանքը և բոլորովին նոր տնտեսակարգ «տեղծել եթէ այդ չի բղխում երկրի տնտեսական զարգացման ներքին անհրաժեշտութիւնից:

Տնտեսական աշխարհն ունի իր սեփական օրէնքները և իր ներքին անխուսափելի ընթացքը: Բռնութիւնը, թէկուզ այդ բռնութիւնը կատարւի պետական իշխանութեան միջոցով, ի վիճակի չէ տեսականօրէն և հիմնականօրէն շեղելու տնտեսութիւնը իր բնականոն զարգացման ուղիից: Նահապետական տնտեսութեամբ ապրող ժողովուրդը չի կարող մի անգամից թռչել հասնել սօցիալիստական տնտեսութեան՝ առանց անցնելու կապիտալիստական խոշոր տնտեսութեան բովից:

Մի ժամանակ Ռուսաստանում նարոզնիկներն էին, որ ունէին այն միամիտ հաւատը, թէ այդ կարելի է: Բայց այժմ նրանց ժառանգորդ ուսու էսէրներն անգամ

հրաժարւել են այդպիսի խակ մտքերից: Եւ միայն բօլշևիկներն են, որ մարքսիզմից յետ նահանջելով՝ իւրացրել են նարօդնիկների հնամաշ գաղափարները և ծախում են աշխարհին որպէս նոր մտքեր:

Ռուսաստանի «սօցիալիստական» յեղաշրջման փորձըն ակնյայտօրէն ցոյց տւեց, որ սօցիալիզացիայի վաղաժամ իրագործումը յետ է մղում երկրի տնտեսութիւնը դէպի նախնական ձևերը և ընդհանուր քայքայում առաջնում:

Մի այդպիսի փորձ Հայաստանում անհամեմատ աւելի աղէտաւոր հետեանքներ պիտի տայ անտարակուսելիօրէն:

Մենք վերլուծեցինք սօցիալիստական յեղաշրջման փորձի տնտեսական հետեանքներն արդի Հայաստանում: Այժմ անցնենք սօցիալական եւ քաղաքական հետեանքներին:

Մեր երկրում չկան խոշոր արդիւնաբերական դասակարգեր, կան սպեկուլիանտներ, վաշխառուներ և առևտրականներ:

Սպեկուլիացիան և սպեկուլիանտները ծնունդ են արտակարգ ժամանակի և արտակարգ պայմանների: Համաշխարհային պատերազմի հետեանքով անհրաժեշտ մթերքների և ապրանքների արտադրութիւնը չափազանց պակասել է: Չափազանց դժւարացել է նաև փոխադրութեան գործը: Փչացել են նաւերը, փչացել են երկաթուղիները, պակասել են ձիերը, անասունները: Այդ բոլորի վերականգնումը պահանջում է երկար ժամանակ: Տասնեակ միլիոնաւոր մարդիկ տարիներ շարունակ ոչինչ չեն արտադրել, այլ միայն սպառել են: Մթերքների և ապրանքների այն վիթխարի պաշարը, որ ստեղծւել էր երկար ժամանակի անդուլ աշխատանքով ամբողջ աշխարհում, այլևս չկայ: Մինչդեռ պահանջը չի նւազել, իսկ առաջարկը պակասել է:

չատ մեծ չափով : Ամենուրեք զգացուում է մթերքներ-
րի, ապրանքների այնպիսի մեծ կարիք, որ մեծապէս
նպաստում է գների բարձրացման : Այդ տեսակէտով
Հայաստանը գտնւում է ամենադժբաղդ պայմանների
մէջ : Պահանջի և առաջարկի փոխ յարաբերութիւնը
անհամեմատ աւելի աճնպաստ է այստեղ, քան մի որ-
ևէ այլ երկրում :

Այսպիսի արտակարգ պայմաններն անխուսափե-
լիօրէն առաջ են բերում սպեկուլիացիան և սպեկու-
լիատիւ կապիտալը :

Ռուսաստանում բօլշևիկները որոշեցին արմատա-
խիլ անել այդ երևոյթը, ոչնչացնել չարաշահերի (սպե-
կուլիանտների) դասը : Ճիշտ է, նրանց յաջողւեց շատ
և շատ սպեկուլիանտներ ոչնչացնել Ֆիզիքապէս, շա-
տերից խել նրանց դրամագլուխները, ապրանքները
և զրկել սպեկուլիացիա անելու հնարաւորութիւնից,
սակայն սպեկուլիացիան, որպէս տնտեսական երևոյթ,
չարիք, չվերացաւ : Որովհետև բօլշևիկների ձեռք ա-
ռած միջոցների հետևանքով ազատ սպեկուլիացիան
դարձաւ միայն գաղտնի և աւելի հրէշաւոր : Սպեկու-
լիացիայով սկսեցին պարապել բոլոր նրանք, որ ապ-
րուստի ուրիշ միջոց չունէին : Խոշոր սպեկուլիացիան
վերացաւ, բայց մնաց և աճեց մանր, սօցիալապէս ա-
ւելի ծաւալուն սպեկուլիացիան, որ աւելի մեծ չարիք
դառաւ ժողովրդի գլխին :

Սպեկուլիացիան մի առ ժամանակ կարելի է մեղ-
մել, սպեկուլիանտներին կարելի է պատժելով զսպել :
Բայց սպեկուլիացիան արմատախիլ անել հնարաւոր է
միայն այն ժամանակ, երբ մթերքների, ապրանքների
բացակայութիւնը կամ պակասութիւնը շուկայում կը
վերանայ բոլորովին : Այդ էր պատճառը, որ բօլշևիկ-
ներին չյաջողւեց Ռուսաստանում վերացնել սպեկու-
լիացիան և սպեկուլիանտների դասը, չնայելով նրանց

ձեռք առած դրակոնական միջոցներին : Հարկաւ նոյնը պիտի լինի և Հայաստանում :

Վաշխառութիւնը եւ վաշխառու դասը նոյնպէս հիմնովին կարելի կլինի վերացնել միայն այն ժամանակ, երբ դրամի պակասութիւնից նեղւող աշխատաւոր մարդիկ հնարաւորութիւն կունենան վարկ ստանալու աւելի ձեռնտու պայմաններով, երբ ինքը պետութիւնն այնքան շատ ազատ դրամ կունենայ, որ ի վիճակի կլինի այդ վարկը տալու կարիք ունեցող աշխատաւորներին : Բօլշևիկեան իշխանութիւնը չի կարող այդքան դրամագլուխ ստանալ երկրի ներսից, որպէսզի ի վիճակի լինի բաւարարել աշխատաւորութեան կարիքը դրամի նկատմամբ. բայց նա չպիտի կարողանայ նաև դրամագլուխ ձեռք բերել դրսից, օտար պետութիւններից այդ նպատակի համար : Ուրեմըն վաշխառուներն էլ կմնան, թէև կարող է փոխւել նրանց անձնական կազմը. կիրակոսը կթալանւի, կըսպանւի, բայց վաշխառու կդառնայ Մարկոսը՝ կիրակոսին թալանողը կամ սպանողը, ինչպէս այդ մենք տեսնում ենք այսօր բօլշևիկեան Ռուսաստանում :

Դառնանք այժմ առևտրին ու առևտրականներին :

Առևտուրը ներկայումս, շնորհիւ ապրանքների շատ մեծ պակասութեան և թղթադրամի արժէքի յարաճուն անկման, առհասարակ ստացել է սպեկուլիատիւ բնոյթ : Դժւար է, և ես պիտի պնդեմ նոյնիսկ, անկարելի է ասել, թէ ո՞րտեղ է վերջանում առևտուրը և ո՞րտեղ սկսւում սպեկուլիացիան : Առևտրականն այսօր գրեթէ նոյն սպեկուլիանտըն է :

Ինչ պիտի անի բօլշևիկեան իշխանութիւնը առևտրի և առևտրականների նկատմամբ : Պիտի գրաւի առևտրականներից նրանց բոլոր ապրանքներն ու խանութները և ինքը աշխատի իր սեփական խանութներըն ունենալ : Բայց նախ՝ մեր երկրում մասնաւոր

Սուրբկանց մտն եզրած ապրանքների քանակը շատ քիչ է: Այդ քիչ էլ որով, զգալի մասը պիտի անհետանայ կամ հարկ ապրանքները գրաւելու և սովետական իրանութի իրանալու ժամանակ, ինչպէս այդ եղան բօլշևիկեան Ռուսաստանում, — մի բան, որից հազիւ թէ աւելի լաւ կատարուի մեզ մտն առեարի նացիօնալիզացիան (ազգայնացում — պետականացումը): Անացած մասը վերջապէս պիտի երևան գայ բօլշևիկեան պետական իրանութում և ծախուի, սպառուի շատ ու շատ կարճ ժամանակում:

Իսկ երբ ծախւեցաւ, վերջացաւ ապրանքը, ո՞ր տեղից և ինչպէս մեր երկիրն ապրանք պիտի հասցընեն մեր տնտրոյս բօլշևիկները:

Բօլշևիկեան իշխանութիւնը չի ունենայ խոշոր գրամագլխի իր տրամագրութեան տակ, որպէսզի կարողանայ այդ գրամագլխով ապրանք ձեռք բերել տրտասահմանում: Իր գրաւած ու ծախած ապրանքի գինըն այնքան չնչին պիտի լինի, որ նրանով անկարելի կլինի երկրի ապրանքային փոխանակութիւնը կատարել բաւարար չափով ու եղանակով:

Ռուսաստանից չի կարելի ունենալ որեւէ սպասելիք, նա ինքն ապրանքների և գրամագլխի անհուն կարիք ունի: Կապիտալիստական արտասահմանը բօլշևիկեան իշխանութեան դրամ չի տայ և չի վստահանայ:

Հետեւաբար, մասնաւոր առեարուրը ոչնչացնելով, բօլշևիկներն իրենք էլ չպիտի կարողանան ապրանքներ հայթայթել ժողովրդին: Աթէ պետութիւնը խափանում է մասնաւոր ձեռնարկութիւնները և իր վրա է վերցնում տնտեսական շատ կարեւոր ֆունկցիաներ, ինչպէս, օրինակ, ապրանքների հայթայթումն և բաշխումը, այդ դէպքում նա ոչ թէ թկօթեացնում է աշխատաւոր ժողովրդի վիճակը, այլ, ընդհակառակը,

չատ դժւարացնում : Որովհետեւ նա ի վիճակի չէ սահմանափակել ժողովրդի պահանջը այն չափով, որ ինքը կարող է բաւարարել : Ժողովրդի պահանջը ազատակող է և այնքան կենսական, որ նա ամեն միջոցի կգիմէ, որպէսզի ապօրինի ճանապարհներով իր կարիքին գոհացում տայ : Այդ հոգի վրա է, որ ծագում է և ծագկում գաղտնի առեւտուրը բօլշևիկեան Ռուսաստանում և ընդունում հրէշային չափեր :

Նոյնն անտարակոյս պիտի լինի և մեզանում :

Ուրիշ խօսքով այն առեւտրական դասը, որ գոյութիւն ունի այժմ, կը վերանայ, ենթարկելով էկսպրօպրիացիայի, սեփականազրկման : Իսկ նրա տեղ հանդէս կգայ մի ուրիշ առեւտրական դաս, որը կը տարբերուի առաջնից իր անձնական կազմով միայն : Եւ այդ դասի մեծամասնութիւնը կգոյանայ գողերից ու թալանչիներից գերազանցապէս : Այդ նոր դասը կը լինի աւելի յանդուգն անչափաւոր եւ աւելի չարաչահ :

Մեր գիւղացիութիւնը, որ կարողացել է վերջին տարիների կռիւներից ու տեղահանութիւններից յետոյ պահպանել իր փոքրիկ նահապետական տնտեսութիւնը, բօլշևիկների օրով պիտի զրկուի և այն սերմացւեց, հացից, երկրագործական գործիքներից եւ լծկաններից, որ նա ստանում է այժմ կառավարութիւնից : Որովհետեւ բօլշևիկները դրանցից և ոչ մէկը չպիտի կարողանան դրսից բերել — ոչ Ռուսաստանից, ոչ էլ որեւէ այլ պետութիւնից :

Մեր գաղթականները պիտի զրկուին, բօլշևիկների իշխանութեան ժամանակ այն բոլոր թէ պետական և թէ մանաւանդ ամերիկեան նպաստներից, որ մինչև այժմ նրանք ստանում են : Եւ նրանք կամ պէտք է սովամահ լինեն, կամ նորից պիտի գաղթեն օտար երկրներ՝ իրենց գլխի ճարը տեսնելու համար :

Մեր ինտելիգենցիան, որ այնքան մեծ դժւարութիւններով է գալիս Հայաստան, կամ այլևս չի վերագառնայ իր հայրենիքը կամ, եթէ վերադարձել է, նորից կերթայ օտար երկիրներ: Որովհետև նա երբէք չպիտի կարողանայ տանել ազատ մտքի և ստեղծագործութեան այն խեղդող մթնոլորտը, որ միշտ և ամենուրեք ստեղծում են իրենց շուրջը բօլշևիկները: Որովհետև այնտեղ, ուր իշխում են բօլշևիկները, այլևս ոչ մի այլ հասարակական հոսանք չի կարող գոյութիւն ունենալ. ով բօլշևիկ չէ, նա ենթակայ է հալածանքի: Այսպէս է բօլշևիկեան Ռուսիայում, այսպէս կլինի և մեզանում:

Մեր խոշոր կապիտալիստական դասը, որ ապրում է Հայաստանի սահմաներից դուրս և որ իր կապիտալով կարող է բեղմնաւորել, կենդանացնել մեր երկրի տնտեսական կեանքը, միանգամայն պիտի հրաժարւի բօլշևիկեան Հայաստանից: Նա, որ այսօր հազիւ է հաշտւում դաշնակցական իշխանութեան հետ, վաղը, եթէ բօլշևիկները տիրող դառնան, կփախչի հեռու, շատ հեռու Հայաստանի սահմաններից:

Այսպիսով մենք տեսնում ենք, որ բօլշևիկեան յեղաշրջումը չի կարող խոստանալ մեր դժբախտ երկրին դրական հետեանքներ նաև սօցիալական տեսակէտով: Ի վիճակի չլինելով Հայաստանի տնտեսական սիստեմի մէջ հիմնական բարեփոխութիւն մտցնել նա չպիտի կարողանայ նաև հիմնովին փոխել մեր երկրի սօցիալական յարաբերութիւնները, պիտի ձգտի ոչընչացնել հին իշխող դասակարգերը միայն նրա համար, որ առաջ բերէ նորերը, որոնք հներից կը տարբերւեն իրենց անձնական կազմով, բայց կը լինեն շատ աւելի մեծ չարիք աշխատաւոր ժողովրդի գլխին, քան անգամ հները:

Փանք այժմ քաղաքական հետեանքներին:

VIII

ԲՕԼՇԵԻԻՉՄԻ ՔԱՂԱՔԱԿԱՆ ՀԵՏԵԻԱՆՔՆԵՐԸ

Հայաստանը գտնուում է այն մեծ ճանապարհների վրա, որոնք տանում են Եւրոպայից դէպի Ասիա, դէպի Մերձաւոր և Միջին Արևելք: Իր ռազմական դիրքով նա իշխում է ամբողջ Փոքր Ասիայի վրա:

Այն մեծ պետութիւնը, որի ազդեցութեան շրջանի մէջ կրնան շայտանալ, ի վիճակի կլինի սպառնալու Անգլիայի ամենակենսական շահերին, ամենախոցելի կէտերին՝ Սուէզի ջրանցքին ու Եգիպտոսին, Միջագետքին ու Պարսկաստանին և, որը ամենակարեւորն է, Հնդկաստանին:

Հին, ցարերի Ռուսաստանն այդ տեսակէտով եղել է Անգլիայի ամենաոխերիմ ու վտանգաւոր թշնամին, բացի 1907—1917 թ. թ. շրջանից, երբ մի աւելի հզօր թշնամու՝ Գերմանիայի սպառնալիքի տակ՝ անգլո-ռուս հակամարտութիւնը կորցրեց ժամանակաւորապէս իր սրութիւնը և վերածւեց անգլո-ռուս համաձայնութեան:

Կնքելով ռազմական ու քաղաքական դաշն Ռուսաստանի հետ և պատերազմի բռնւելով Գերմանիայի հետ, Անգլիան սակայն երբէք չմոռացաւ իր շահերն Արևելքում և ամեն ջանք թափեց, որ համաշխարհային պատերազմից իր ախոյան Ռուսաստանը դուրս չգայ զօրացած: Ժամանակը հասած չէ տակաւին ճշտելու հանգամօրէն այն բաղադրող դերը, որ Անգլիան կատարեց այդ ուղղութեամբ (Ռուսաստանի քաղաքական կեանքում, պատերազմի սկիզբից մինչև այսօր: Բայց մի բան անտարակուսելի է թւում այժմ իսկ— այն է, որ առանց Անգլիայի «օգնութեան» հազիւ թէ Ռուսաստանն ընկնէր իր ներկայ ողբալի վիճակի մէջ:

Բօլշևիկեան Ռուսաստանի այսօրւայ կռիւլ Անգլիայի դէմ ոչ թէ մի նոր երևոյթ է (բաղխում համաշխարհային պրօլետարիատի, որ իբր թէ ռուս բօլշևիկներն են ներկայացնում, և համաշխարհային իմպերիալիզմի միջև, ինչպէս շատ միամիտներ կարծում են և մեզանում), այլ մի շատ հին իրողութիւն: Եւ այդ իրողութիւնն ուրիշ բան չէ, եթէ ոչ ռուսական իմպերիալիզմի և անգլիական իմպերիալիզմի հակամարտութիւնը: Ուրիշ խօսքով, բօլշևիկեան Ռուսաստանը շարունակում է ցարերի վաղեմի քաղաքականութիւնը Անգլիայի դէմ: Այն տարբերութեամբ միայն, որ ներկայումս դերերը փոխւած են: Առաջ Անգլիան էր որ թէ ու թիկունք էր տալիս մեռնող թիւրքիային, պաշտպանում այն՝ ռուսական իմպերիալիզմի հարւածներէց ու դաւերից: Իսկ այսօր բօլշևիկեան Ռուսաստանն է, որ ձգտում է պահպանել մահւան գատապարտւած տաճկական կայսրութիւնը և վերջինիս ոյժ տալու միջոցով՝ աշխատում է ի դերեւ հանել Անգլիայի իմպերիալիստական ծրագրները Արեւելքում:

Այսպիսով բօլշևիկեան Ռուսաստանը, որ իր ազգային կռիւլ Անգլիայի դէմ քողարկում է ինչ որ «համաշխարհային», եւ «պրօլետարական» ֆրազներով ու նշանաբաններով, իրօք իր հերթին իմպերիալիստական մի պայքար է մղում անգլիական իմպերիալիզմի դէմ: Ռուսական բօլշևիզմը այսօր ռուսական ուժասպառ ու ջախջախւած իմպերիալիզմի մի նոր ձևն է, որով նա կամենում է խաբել, մոլորեցնել իր եւ օտար ժողովրդական զանգւածները՝ աւելի յաջողութեամբ հետապնդել կարենալու համար իր մութ նպատակները:

Ազգերի եւ պետութեանց պատմութիւններն իրենց ներքին տրամաբանութիւնն, իրենց ներքին մը-

դուժներն ունին : Խելագար են այն մարդիկ եւ խըմ-
բակցութիւնները, որոնք իրենց սղորմելի ոյժով եւ
ցանկութիւններով կամենում են շրջել պատմութեան
անիւը եւ տիրաբար ազգել իրենց ազգի պատմական
ընթացքի վրա : Իշխանաւորները չեն որ իրենց քմա-
հաճոյքով որոշում են իրենց ազգի ու պետութեան
քաղաքական, ուղին, այլ երկրի աշխարհագրական դիր-
քը, նրա տնտեսական վիճակն ու պահանջները, ժո-
ղովրդի առանձնայատկութիւններն ու հոգեբանութիւ-
նը, որ դարբնել է դարերի ընթացքում, նրա կուլ-
տուրայի եւ տօնիկայի աստիճանը եւ մի շարք այլ ա-
ռարկայական պայմանները : Լինա այս ազգականներն են,
որ իրենց աիրական գրոշմն են դնում այն բոլոր ան-
հատների քաղաքականութեան վրա, որոնք ցնորական
յանդգնութիւնն ունին իրենց սեփական քմահաճոյքով
ու գաղափարներով դուրս գալու իրենց պետութեան
եւ ազգերի պատմութեան կենսական շահերի ու պա-
հանջների դէմ :

Եթէ լենինն ու իր համախոհները հրապարակ ե-
կան թերեւ շատ տարբեր ձգտումներով ու նպատակ-
ներով, քան այն, որ նրանք հետապնդում են այսօր,
այժմ արդէն պարզ է միանգամայն, որ սչ թէ նրանք
են հարկադրել Ռուսաստանը որդեգրելու իրենց «հա-
մաշխարհային» «սօցիալիստական», «բարձր» նպա-
տակները, այլ ընդհակառակը, Ռուսաստանն է, որ
ստիպել է նրանց «սօցիալիստական» նպատակների մէջ
դնել բոլորովին այլ բովանդակութիւն, ռուսական
ազգային իմպերիալիստական բովանդակութիւն :

Ռուսաստանի պատմութիւնը այսօր բօլշևիկների
ձեռքով է ձգտում իրագործել իր ազգային նպատակ-
ները :

Նկատի ունենալով Ռուսաստանի ներքին տնտե-
սական կատաստրօֆիկ վիճակը եւ նրա միանգամայն

խախտւած միջազգային դիրքը, կարելի է անվերապահօրէն պնդել, որ Ռուսաստանի ներկայ մղումը դէպէս Արևելք ուրիշ բան չէ, եթէ ոչ յուսահատական ջղածգութիւն, որ բղխում է կատարեալ անզօրութիւնից՝ խոցելու իր ամենամեծ ախոյեանին՝ Անգլիային:

Անգլիան, իր իմպերիալիստական մեծ ծրագրների իրագործումն անպայմանօրէն ապահովելու համար, հրամայական պէտք ունի ստեղծելու Հայաստանը, մի անգամ ընդմիջտ ազատելու այն՝ ռուսական լուծից ու ոտնձգութիւններից և իր ազդեցութեան շրջանի մէջ գցելու այն: Անգլիական տեսակէտով Հայաստանը վստահելի կլինի միայն այն ժամանակ, երբ հեռու կը լինի ռուսական ազդեցութիւններից ու դաւերից: Աւելին. նա պէտք է լինի հակառուսական: Այլապէս նա միշտ կասկածի տակ կմնայ: Այդ պարագային Անգլիան միշտ ի վիճակի կլինի դժւարութիւններ և անախորժութիւններ պատճառելու Հայաստանին: Ռուսական ամեն մի միջամտութիւն հայկական գործերին, հայկական ամեն մի հակում դէպի ռուսները՝ անխուսափելիօրէն կործանարար կերպով պիտի անդրադառնայ Հայաստանի քաղաքական բաղդի վրա:

Գնահատութեան առնելով միջազգային ոյժերի փոխ-յարարերութիւնն ու զօրութիւնը ներկայումս, առանց որևէ տատանումի մենք մի անգամ ընդմիջտ պիտի պարզենք մեզ համար, որ մեր քաղաքական բաղդի վերջնական որոշումը գերազանցապէս, եթէ չասեմ բացառապէս, կախւած է Անգլիայից: Ռուսաստանի դերը Մերձաւոր Արևելքում և մասնաւորապէս Հայաստանում վերջացած պէտք է համարել: Անգլիան կաշկանդել, շղթայել է Հիւսիսի մեծ պետութիւնն այնպէս, որ նա երկար ժամանակ չպիտի կարողանայ այլևս որևէ կշիռ ու ձայն ունենալ Արևելքում: Անգ-

լիայի արևելեան քաղաքականութեան գլխաւոր նպատակներէց մէկն էլ այս պահիս այն է, որ Ռուսաստանը թէ ռազմապէս և թէ քաղաքականապէս սանձահարելի առմիշտ և այլևս միանգամայն անվտանգ դառնայ Անգլիայի համար: Այդ նպատակի համար է, որ նա ստեղծուի է Մերձբալթեան պետութիւններ, հզօր Լեհաստան, Ուկրայնա, անդրկովկասեան ու թերևս և կովկասեան պետութիւններ: Այդ նպատակի համար է, որ Ռուսաստանը ուժասպառ է տրւում:

Բայց Ռուսաստանն այսպէս թէ այնպէս մի մեծ պետութիւն է, որ ապագային կարող է վերստին դառնալ մի ահարկու, սպառնական ոյժ Անգլիայի հանդէպ:

Եւ այսօրւայ վիճակը չէ որ մտահոգիչ է Անգլիայի համար, այլ վաղւանը:

Պէտք է կանխել դէպքերը, պէտք է նախատեսել միջազգային ոյժերի վտանգաւոր դասաւորումները և համապատասխան նախազգուշական միջոցներ ձեռք առնել այժմէն իսկ: Այս է, որ ստիպում է անգլիական հեռատես քաղաքագէտներին մի այնպիսի հաշտութիւն կնքել Անգլիայի համար վտանգաւոր ոյժերի հետ, որպէսզի ստեղծուին, աճեն ու զօրանան այն ուժերը, որոնց միջոցով հնարաւոր լինի պահպանել քաղաքական հաւասարակշռութիւնը ապագայում:

Երեք մեծ վտանգաւոր ոյժեր կան, որ անխուսափելիօրէն պիտի դառնան Անգլիայի համար մի անխորտակելի վտանգ, եթէ թոյլ տրւի որ նրանք միանան, եթէ այժմէն իսկ նրանց միացման դէմ պատւարներ չկառուցւին: Այդ ոյժերն են՝ Գերմանիան, Ռուսաստանն և Թիւրքիան:

Այս երեք ոյժերի միացումը անկարելի, կամ անվնաս դարձնելու համար Անգլիան ամեն ճիգ է թափում մի կողմից՝ ուժասպառ անելու երեք պետու-

թիւնները թէ ազգամայէս, թէ տնտեսամայէս և թէ քաղաքականամայէս, միւս կողմից՝ շղթայելու նրանց նոր ազգային պետութեանց երկաթէ օղակով, որը ի վիճակի լինի կասեցնելու ամեն մի քաղաքական վըտանգ:

Գերմանիան արդէն օղակած է այդպիսի պետութեանց շղթայով—Չեխօ-Սլաւիա, Ռուսմանիա, Ուկրայնա, Լեհաստան, Լիտվա, Լատվիա, Էստօնիա:

Ռուսաստանը շղթայուում է Ֆինլանդիայով, Էստօնիայով, Լատվիայով, Լիտվայով, Լեհաստանով, Ուկրայնայով, Ռուսմանիայով, իսկ հարաւում անդըրկովկասեան ու թերեւ կովկասեան նոր պետութիւններով:

Տաճկաստանը շղթայուում է արաբիայով, Միջագետքով, Սիւրիայով, Յունաստանով, Հայաստանով, հաւանաբար Քիւրդստանով և վերջամայէս մի շարք եւրոպական գաղութներով—Փրանսիական Կիլիկիայով, Իտալական Ադալիայով, փաստօրէն անգլիական Պօլսով ու նեղուցներով:

Այս քաղաքական հոյակապ կառուցւացքը արհեստական չէ բնաւ, այլ հիմնուած է, մի քանի ոչ էական շեղումներով, ազգային առողջ և կենսունակ ըսկզբունքի վրա: Նորակազմ բոլոր պետութիւններն էլ գերազանցամայէս ազգային պետութիւններ են և բոլոր տւեալներն ունեն զարգանալու և զօրանալու: Այդ պետութիւններն են որ բաժանում են այսօր Գերմանիան Ռուսաստանից, Ռուսաստանը՝ Տաճկաստանից:

Հայաստանը այդ շղթայի օղակներից մէկն է, որ բաժանում է եւ բաժանելու է Ռուսաստանը Տաճկաստանից: Դաշնակից պետութեանց եւ առանձնամայէս Անգլիայի համար, որ ստեղծում են Հայաստանը, հայկական պետութիւնը այն չափով արժէք կունեննայ, որ

չափով վերջինս հակում չի ունենայ ոչ դէպի Տաճկաստանը, ոչ էլ դէպի Ռուսաստանը:

Երբէք չպէտք է մոռնալ, որ Հայաստանը չի ըստեղծուում յանուն արդարութեան կամ մարդասիրութեան, այլ միմիայն քաղաքական նպատակներով: Իսկ այդ քաղաքական նպատակն է ծառայել իբրեւ պատնէշ Ռուսաստանի եւ Տաճկաստանի կամ համառուսական եւ համիտլամական շարժման միջեւ:

Այդ պատճառով Հայաստանը մի անգամ ընդմիջտ պէտք է դադարի գործիք լինելուց Ռուսաստանի ձեռքում: Ռուսական որ եւ է ապդեցութիւն չպէտք է լինի այլեւս Հայաստանի մէջ եւ Հայաստանի վրա:

Քաղաքական այն իւրայատուկ պայմաններում, որոնց մէջ կառուցուում է հայկական պետութիւնը, միջազգային ոյժերի փոխայարաբերութեան այն շրջանում, երբ վերջնականապէս ձեւաւորուում է Հայաստանի քաղաքական բաղդը, ոչինչ չկայ աւելի մնասակար եւ, ես կասեմ նոյնիսկ, կործանարար հայ ժողովրդի համար, քան այն կոյր եւ ստրկամիտ ուսասիրութիւնը, որ այս կամ այն ձեւով երեւան է գալիս մեր քաղաքական կեանքում:

Վերջին երկու տասնեակ տարիների ընթացքում մեր բոլոր քաղաքական սխալների, սայթաքումների եւ յուսահարութիւնների գլխաւոր պատճառը եղել է մեր ազգային մոլեգին ուսասիրութիւնը եւ ուսական օրիենտացիան, որ ահագին մնասներ է տւել մեզ, անգամ վերջին երկու տարիների մեր անկախ գոյութեան ժամանակ:

Եւ եթէ վրաստանն ու Ադրբէջանը, որոնց միջազգային դրութիւնը մեզանից շատ աւելի խախուտ եւ աննպաստ էր, կարողացան քաղաքական խոշոր նւաճումներ անել եւ մեզանից շատ աւելի ամրացնել

իրենց դիրքը, դրա գլխաւոր պատճառներէց մէկն էլ
այն էր, որ նրանք հակառուսական օրինատացիա ու-
նէին, — մի բան, որ միանգամայն համապատասխա-
նում էր դաշնակիցներէ եւ առանձապէս Անգլիայի
շահերին:

Մինչդեռ Հայաստանը կուրօրէն շարունակում էր
իր ռուսասիրական քաղաքականութիւնը, որ մեծամեծ
կասկածներ էր յարուցանում Անգլիայի ղեկավար շքր
շաններում: Դրանից առաջ էր գալիս այն անվստա-
հութիւնը, որ ունէր Անգլիան դէպի մեր պետութիւ-
նը: Մեր տրամագրութիւններն ու հրապարակային
արտայայտութիւններն այնպէս էին, որ ակամայօրէն
տարակուսանք էին յարուցում դրսի աշխարհում, թէ
մենք իրօք ձգտում ենք որեւէ ձեւով միանալ կրկին

Ռուսաստանին: Ռուսական շորշոփը չէր անցել մեր
վրայից, մենք բոլորս էլ հիւանդ էինք ռուսական
հիւանդութեամբ, մեր ազգային մտայնութիւնը կար-
ծես անգօր էր թօթափել իր ռուսական հովերը, մեր
ազգային կամքը չէր գտնում իր մէջ բաւականաչափ
վճռականութիւն մի անգամ ընդմիշտ կտրելու մեր
յոյսերը, մեր կապերը Ռուսաստանից:

Այդ բոլորն առաջ էր գալիս մասամբ այն բա-
նից, որ հարիւր տարւայ ռուսական տիրապետութիւ-
նը շատ ուժեղ դրոշմ է դրել մեր հոգու վրա: Մա-
սամբ էլ այն բանից, որ մինչեւ այսօր էլ մենք մեզ
պարզ հաշիւ չենք տալիս, թէ ինչ հսկայական յեղա-
շքրջումներ են կատարուել միջազգային ոյժերի փոխյա-
րաբերութեանց մէջ, թէ պարտւած, քայքայւած,
բաժան բաժան եղած Ռուսաստանը այլեւս ոչ մի դը-
րական դեր չունի կատարելու Մերձաւոր Արեւելքում,
թէ Հայաստանի բազմը տնօրինողների շարքից դուրս
է չպրտւած Ռուսաստանը, եթէ չասեմ առմիշտ, գէթ
չատ եւ շատ երկար ժամանակով:

Միւս կողմից մենք կարծես տակաւին պարզօրէն չենք գիտակցում, որ երկրագնդի այն մասի վրա, ուր գտնւում է Հայաստանը, Անգլիային է վիճակւած վրձնական խօսք ասել ի վերջոյ, եւ որ մեր քաղաքական ապագան կախւած է աշխարհիս այդ հզօրագոյն պետութիւնից:

Մեզ համար պարզ պիտի լինի բացարձակօրէն, որ եթէ կայ այսօր մի մեծ պետութիւն, որը կամենում է եւ շահ ունի ազատ ու անկախ հայկական պետութիւն ստեղծել, Անգլիան է դա:

Ռուսաստանը միշտ ձգտել է կլանել Հայաստանը, ձեռք բերել մեր երկիրը առանց հայերի: Այդպէս է եղել ցարական հզօր Ռուսաստանը, այդպէս է այսօր եւ բօլշեւիկեան ուժասպառ Ռուսաստանը:

Ռուս բօլշեւիկները, իսկ նրանց յետեւից նաեւ հայ ստրկահոգի բօլշեւիկները կամենում են Հայաստանը ենթարկել նորէն Ռուսաստանի ազդեցութեան: Այդ անելով՝ նրանք բնաւ չեն մտածում հայ ժողովրդի բարօրութեան մասին, այլ ընդհակառակը, նրանք դաշն են կապում հայ ժողովրդի երդւեալ թշնամիներին՝ թուրք տաճիկներին հետ, որպէսզի հայ ժողովրդի դիակի վրայով միանան թուրք ազգայնականերին հետ եւ նրանց միջոցով ամբապնդեն Ռուսաստանի դիրքը հանդէպ Անգլիայի:

Ռուս բօլշեւիկները ձգտում են իրենց հայրենադաւ հայ ընկերների միջոցով հայ ժողովրդի բազմի հետ խաղալ այնպէս, ինչպէս սովոր էին խաղալ ուսուցարները: Փոխւել են ժամանակները, փոխւել են պայմանները, փոխւել են նշանաբանները, հագուստները, գոյները, բայց ուսուսական հայաջինջ ոգին մնում է անստասան: Նրա մահահոտ շունչը նորէն զգացւում է մեր հորիզոնների տակ այս ծանր օրերին:—

Եւ նրանք, որ ձգտում են դէպի կեանք, դէպի

ազաաութիւն, դէպի անկախութիւն, պիտի ըմբռնեն վերջապէս, որ բօլշեփկեան Ռուսաստանը կատարելապէս անզօր է տնօրինելու Հայաստանի բաղդը և որ մեր ճակատագիրը կապել, թէկուզ ժամանակաւորապէս, մահւան դատապարտւած նրա քաղաքական սիւստեմի և իմպերիալիզմի հետ, նշանակում է քարտի վրա դնել մեր դատը, մեր ազգի ամբողջ ապագան...

ԲՕԼՇԵՒԻԿԵԱՆ ԱՒԱՆՏԻՒՐԱՆ ՀԱՅԱՍՏԱՆՈՒՄ

Չափազանց բնորոշ են բօլշեփկների համար այն խօսքերը, որ Մօսկւայի արտաքին գործոց կօմիսար Չիչերինը նորերս ուղղել էր Անգլիայի արտ. գոր. նախարարին իր վերջին նօտայի մէջ: «Մենք պատրաստ ենք յարգել Անգլիայի շահերը կովկասում», — ասում էր Չիչերինը: Ուրիշ խօսքով՝ բօլշեփկները, որոնք իրենց կօմժունիստներ, սօցիալիստներ են համարում և երեք տարի առաջ այնքան աղմուկ հանեցին, անվերապահօրէն ու կատալիօրէն պաշտպանելով ազգերի ինքնորոշման բացարձակ իրաւունքը և «առանց աննեկսիայի եւ կօնտրիբուցիայի» սկըքբունքը, այսօր պատրաստ են առևտուր անել անգլիացիների հետ ի հաճիւ կովկասեան ազգերի:

Սա մի աւելորդ ապացոյց է, թէ բօլշեփկի անւան տակ իրօք թագնւած է ռուսական իմպերիալիզմը, որ չարաչար պարտւելով անգլիական իմպերիալիզմից, աւելի ձեռնտու պայմաններով հաշտութիւն կնքելու համար վերջինիս հետ՝ կամենում է ծախել իր «պատմական» իրաւունքները ռուս ցարերի նւաճած ազգերի նկատմամբ, որոնք այնքան մեծ գոհաբերութիւններով հազիւ են կարողացել ազատւել ռուսական անարգ լուծից:

Բօլշեփկները պատրաստ են յարգել ոչ թէ ինք-

նորոշող ազգերի իրաւունքները կովկասում, այլ Անգլիայի շահերը կովկասում: Աւելի պերճախօս խոստովանութիւն չէր կարող լինել նրանց կողմից:

Սակայն, եթէ այսպէս թէ այնպէս կարելի է դեռ ըմբռնել ռուս բօլշևիկներին այս քաղաքականութիւնը մանր ազգերի հանդէպ, որ, ճիշտ է, ոչ մի առնչութիւն չունի սօցիալիզմի և սօցիալիստական սկզբունքների հետ, բայց թելադրում է ռուսական հայրենասիրութիւնից, — ապա ի՞նչպէս բացատրել հայ բօլշևիկներին ազգակործան ընթացքը: Եւ իրաւ. մինչ ռուս բօլշևիկները պատրաստ են ծախելու ուրիշ ազգերի իրաւունքներն ու շահերը, հայ բօլշևիկները առետուր գիտեն անել միայն իրենց ազգի իրաւունքներով ու շահերով:

Որ հայ բօլշևիկները, փորձ անելով Հայաստանում հաստատելու իրենց իշխանութիւնը, վաճառել են իրօք հայ ժողովրդի շահերն ու իրաւունքները և այդպիսով, գիտակցաբար թէ անգիտակցաբար, վտանգել են ուզում ոչ միայն հայ ժողովրդի քաղաքական ապագան, այլ և նրա Ֆիզիկական սպագան, գոյութիւնը, — այդ արդէն կասկածից վեր է այսօր, երբ մեր ձեռքում բազմաթիւ ապացոյցներ կան: Հայ բօլշևիկները կրկնակի վաճառք են կատարել. նրանք ծախել են Հայաստանը մի կողմից ռուսներին, միւս կողմից՝ թուրքերին:

Մէկդի թողնելով հայ բօլշևիկներին յանցաւոր կապերը մեր ժողովրդի ազատ և անկախ քաղաքական գոյութեան թշնամի ներքին հակապետական տարրերի և մեր ժողովրդի Ֆիզիկական գոյութեան սպառնացող համիսլամական արտաքին ոյժերի հետ, վերցնենք իրերի առարկայական դրութիւնը: Այս կերպ աւելի անաչառօրէն կարելի պիտի լինի պարզել հայ բօլշևիկներին կատարած ոճիրը:

Ով քիչ ծանօթ է բօլշևիկեան Ռուսաստանի քաղաքական հրաբղխային վիճակին, նրա տնտեսական անպատմելի քայքայման, նրա միջազգային աննախընթացօրէն խախուտ դիրքին, նա մի վայրկեան իսկ չի կարող իրեն թոյլ տալ սպասելու, որ այսօրուայ Ռուսաստանը ի վիճակի է ունէ քաղաքական, ռազմական կամ նոյնիսկ տնտեսական օգնութիւն հասցնել Հայաստանին: Ռուս բօլշևիկները, դուրկ չլինելով իրականութեան զգացումից, շատ լաւ են գիտակցում, որ իրենց ներկայ ոյժերով իրենց իշխանութիւնը երբէք չպիտի կարողանան տնտեսական հաստատել Անդրկովկասում և մասնաւորապէս Հայաստանում: Թէ Անդրկովկասը եւ թէ յատկապէս Հայաստանը նրանց համար այն չափով արժէք ունեն, որ չափով որ, այս երկրներում խլրտումներ եւ անկարգութիւններ յարուցանելով, նրանք կարող են անախորժութիւններ պատճառել Անգլիային և այդ միջոցով հարկադրել վերջինիս իրենց հետ աւելի նպաստաւոր հաշտութիւն կընքել: Իսկ թէ այդ խլրտումների և անկարգութիւնների հետևանքով այդ երկիրների ժողովուրդները կարող են մեծապէս տուժել և նոյնիսկ բնաջինջ լինել, այդ միանգամայն չի հետաքրքրում բօլշևիկների անլան տակ գործող ռուս իմպերիալիստ քաղաքագէտներին: Ռուս բօլշևիկները շատ լաւ գիտեն, որ իրենց դաւերն Անդրկովկասում և առհասարակ Մերձաւոր Արևելքում էպիզոդներ են, անցողակն գէպքեր, պարզապէս քաղաքական աւանտիւրաներ, որոնց նպատակը միանգամայն օտար է և նոյնիսկ հակառակ անդրկովկասեան ազգերի շահերին: Բայց նրանք չեն հրաժարուում այդ աւանտիւրաներից, որովհետև այդ պահանջում է ռուս ազգի, ռուս պետութեան, ռուս իմպերիալիզմի շահը: Սակայն, եթէ ռուս ազգի և պետութեան շահերը ապահովեն ուրիշ

ճանապարհներով, ուրիշ եղանակներով, այն ժամանակ
նակ ռուս բօլշևիկները պատրաստ կլինեն յարգել
Անգլիայի իրաւունքներն ու շահերը կովկասում եւ
Հայաստանում:

Ի՞նչ է ուրեմն հայ բօլշևիկների արածը մեր երկ-
րում. ոչ այլ ինչ, եթէ ոչ գործիք ծառայել ռուս բօլ-
շևիկեան իմպերիալիստների ձեռքում հայ ժողովրդին
միանգամայն օտար նպատակների համար: Այդ դաւա-
ճան դերը կատարելու համար հայ-բօլշևիկները հար-
կաւ ստացել են ռուսներից առատ վարձատրութիւն: W

Սակայն, եթէ հայ բօլշևիկների ընթացքը ռուս-
ների հանդէպ կարող է դեռ որեւէ գաղափարական ե-
րևոյթ ունենալ, ապա այդ երևոյթից միանգամայն
զուրկ է նրանց «քաղաքականութիւնը թիւրքերի հան-
դէպ: Այդ «քաղաքականութիւնը» բառիս բուն ի-
մաստով դաւաճանութիւն է բացարձակապէս:

Ամբողջ աշխարհին յայտնի է այն յանցաւոր կա-
պը, որ գոյութիւն ունէր որոշ ժամանակից ի վեր
ռուս բօլշևիկների և օսմանեան ջարդարար փաշաների
միջև: Նուրի և Խալիլ փաշաները չէին էլ թագցնում,
որ նրանք բօլշևիկների հետ են: Նրանց յանդուգն
դաւերը Դաղստանում, Ադրբէջանում, Ղարաբաղում,
Ջանգեզուրում, Նախիջևանում ոչ մի տարակոյս չէին
կարող թողնել, թէ տաճիկ ջարդարարները զանազան
քաղաքական խաղերի միջոցով ձգտում են իրականա-
ցրնել նոյն հայաջինջ ծրագիրը, որ նրանք Տաճկաս-
տանում կատարելուց յետոյ հրամայական կարիք էին
զգում աւարտել Ռուսահայաստանում:

Հայ ժողովրդի և քաղաքական եւ փիլիսոփայական
գոյութիւնն անհանդուրժելի է համաթրքական, հա-
միսլամիստական իմպերիալիզմի տեսակէտով: Հայ
ժողովրդի կատարեալ բնաջնջումը անհրաժեշտ է մի-
անգամ ընդ միշտ վերացնելու համար այն վտանգը,

որ խանգարում է համաթրքական մեծ նպատակների իրագործման: Հայ ժողովուրդը պէտք է ամբողջովին զոհւի, որպէսզի թրքութիւնը ազատ շունչ քաշի, ապրի իր նախկին սանձարձակ և կուլտուրաւեր կեանքով:

Տաճկական այս ծրագիրը վիժեց՝ շնորհիւ Տաճկաստանի պարտութեան: Բայց տաճկական ղեկավար տարրերը բնաւ չհրաժարուեցին այդ ծրագրի իրագործումից:

Ստեղծւած քաղաքական նոր պայմաններում պէտք էր միայն պայքարի ձեւերը փոխել: Եւ երկտասարդ թիւրքերը, հայաջինջ ծրագրի հանձարեղ հեղինակները, փոխեցին Տաճկաստանում իրենց անունը և ծայր տւին ազգայնական մի «նոր» շարժման «Միլլի» անունով: Այդ պէտք էր դաշնակիցներին մոլորեցնելու համար:

Խուսափումի սահմաններում նրանց ագենտները դարձան բոլշևիկները, որպէսզի այդ եղանակով կարողանան հեշտութեամբ խաբել ռուսներին: Այդ էլ ռուսներին ոյժից օգտուելու համար:

Ամիսներ շարունակ նրանք կռիւ մղեցին Ադրբէջանում Մուսաւաթի դէմ, որ, իրենց կարծիքով, բաւականաչափ վճռական և կտրուկ չէր իր հայաջինջ քաղաքականութեան մէջ: Պէտք էր հայերին մի մահացու հարւած հասցնել նաև Անդրկովկասում, մինչդեռ Մուսաւաթը հրապարակ հանեց այդ գործում իր կատարեալ ապիկարութիւնը, անզօրութիւնը: Տաճկաստանն իր ներկայ օրհասական վիճակից կարելի է հանել հեշտութեամբ, եթէ վերանայ մէջտեղից անիծեալ Հայաստանը և հայկական հարցը, և Ադրբէջանն անմիջապէս միտնայ թուրքիային: Օսմանեան ուժերն այն ժամանակ կկրկնապատկւեն, կեռապատկւեն, եւ նզովեալ Անտանարը, կատարւած իրողութեան առջև

գրուելով, կամայ թէ ակամայ ստիպւած պիտի լինի քաղաքականապէս նւիրագործել ստեղծւած փաստական գրութիւնը: Ազատ և անկախ Ադրբէջան պէտք է. նա պէտք է Տաճկաստանին այն չափով, որ չափով որ նրա օգնութեամբ Տաճկաստանը պիտի վերականգնւի և զօրանայ: Ադրբէջանը պէտք է ծառայի Տաճկաստանի շահերին, դառնայ նրա գործիքը, այլապէս նրա գոյութիւնը որևէ իմաստ չունի: Եթէ Ադրբէջանը՝ Տաճկաստանի քաղաքական բաղդի որոշման այս ճակատագրական վայրկեանին՝ չկարողացաւ որևէ իրական օգնութիւն ցոյց տալ վերահաս վտանգից իր մայր հայրենիքն ազատելու համար, այն ժամանակ աւելորդ է նոյնիսկ նրա գոյութիւնը:

Այս նկատումներից ելնելով, տաճկական փաշաներն իրենց ազենտների հետ միասին ամիսների անդուլ աշխատանքով կազմակերպեցին այն բոլջեիկեան — համիսլամական շարժումը, որը նախապատրաստեց նորերս Բագուում տեղի ունեցած «խորհրդային յեղաշրջումը»:

Անտարակուսելի է այժմ, որ այդ «յեղաշրջումը» ամիսներ առաջ մտածւած ու ծրագրւած մի «յեղաշրջում» էր: Անտարակուսելի է նոյնպէս, որ այդ «յեղաշրջումը» կատարւել է թուրքական բոլոր կուսակցութեանց հաւանութեամբ և մասնակցութեամբ:

Բաւական է մատնանշել այստեղ միայն այն բնորոշ փաստը, որ Ադրբէջանի իշխող կուսակցութիւն Մուսաւաթը, չնայելով, որ հիւսիսից արշաւում էին բոլջեիկեան բանակները եւ սպառնում Ադրբէջանի անկախութեան, փոխանակ իր սյժերը կենտրոնացրնելու հիւսիսային ճակատում, իր բոլոր զօրքերը ուղարկեց դէպի Ղարաբաղ և Ջանգեզուր: Եւ որքան աւելի էր ուժեղանում բոլջեիկեան վտանգը, այնքան աւելի մեծ եռանդով ու անվերապահութեամբ մուսա-

ւաթական կառավարութիւնը յարձակողական նախապատրաստութիւններ էր տեսնում հայ ժողովրդի և Հայաստանի դէմ, Ղարաբաղի եւ Զանգեզուրի ճակատում:

Ադրբէջանի նոր, բոլշևիկեան կառավարութիւնը, որը ծնւեց ջարդարար Զիւանշիր խանի կարիներտում, առանց որևէ դիմադրութեան Մուսաւաթի կողմից, կոչւած էր միայն օգտուելու Մուսաւաթի նախապատրաստական աշխատանքներից եւ աւելի վճռական եղանակով իրագործելու այն, ինչ որ չէր յաջողւել Մուսաւաթին, — այսինքն իրագործել տաճկական ծրագիրը — կոտորել հայերին, և Ղարաբաղի ու Զանգեզուրի վրայով միացնել Ադրբէջանը Տաճկաստանի հետ:

Որո՞նք էին այն նոր միջոցները, որոնցից զուրկ էր Մուսաւաթը և որոնց օգնութեամբ այսօր Ադրբէջանի «խորհրդային» նոր կառավարութիւնը յոյս ունէր իրագործելու տաճկական վաղեմի ծրագիրը հայ ժողովրդի գոյութեան դէմ: Այդ միջոցներն էին նախ՝ այն ազգական ուժերը, որոնք պիտի գային բոլշևիկեան Ռուսաստանից, համաձայն ռուս-տաճկական գաղտնի դաշնագրի, և երկրորդ՝ այն ներքին յեղաշրջումը, որ նրանք յոյս ունէին առաջ բերելու Հայաստանում իրենց կաշառած մարդկանց միջոցով:

Ռուս բոլշևիկեան ոյժերը չեկան Ադրբէջան, ծառայելու տաճկական շահերին: Նրանք եկան այն չափով, որ չափով որ այդ պէտք էր Բագրից նախապատրաստութիւնը դէպի Ռուսաստան ապահովելու համար: Աւելին թիրեւս նրանք երբէք էլ լուրջ մտադրութիւն չեն ունեցել անելու: Խլրտումներ, անկարգութիւններ, բարդութիւններ առաջ բերել անդրկովկասեան պետութեանց մէջ — ի՞նչու չէ: Բայց ազգական ոյժեր բերել, — ոչ: Իսկ խոտուումներ տնչուչտ

առևս բօլշևիկները տւած էին տաճիկներին՝ վերջին-
ներին իրենց կողմը գրաւելու և իրենց նպատակներին
համար օգտագործելու դիտաւորութեամբ: Սակայն
լեհական ճակատն ու բօլշևիկիան Ռուսաստանի ներ-
քին խախուտ վիճակը թոյլ չտւին, որ առևները
լայնօրէն կատարէին իրենց խոստումները, եթէ եր-
բէք նրանք լրջօրէն տրամադիր եղել են այդ անել:
Եւ այդպիսով կամայ թէ ակամայ խաբեցին տաճիկ-
թիւրքերին:

Յեղաշրջումը Հայաստանում պիտի կատարէին
հայ բօլշևիկները՝ համաձայն Ադրբէջանից եկած հը-
րահանգների:

Ինչ տարրերի վրա կարող էին յենւել և պիտ
յենւէին այդ դաւաճանները:

Առաջին՝ այն մոլորւած ու այլասերւած երիտա-
սարդների վրա, որոնք թէև զուրկ չեն գաղափարա-
կանութիւնից, բայց հիւանդ են առևական ինտելի-
գենցիայի հիւանդութեամբ, հոգու հիւանդութեամբ:

Երկրորդ՝ ծագումով հայ, բայց ոգով առև տար-
րերի վրա, որոնց համար Հայաստանը և հայ ժողո-
վուրդը խորթ են, որոնք Հայաստանի վրա նայում
են, որպէս մի ժամանակաւոր, յսճախ ակամայ կա-
յանի վրա, կամ որպէս մի կթան կովի վրա, և ո-
րոնք, երբ կհանքը Ռուսաստանում խաղաղւի, առանց
անգամ նայելու պիտի փախչեն Ռուսաստան: Դրանք
կամ անկախ Հայաստանի դէմ են, կամ լաւագոյն
դէպքում, անտարբեր են: Դրանք առև իմպերիա-
լիզմի կամայ թէ ակամայ ագենտներն են:

Երրորդ՝ այն ոչ հայ տարրերի վրա, որոնք չեն
կարող կամ չեն կամենում հաշտւել Հայաստանի ան-
կախ գոյութեան հետ: Ռուսները, որովհետև երէկ
տիրող էին, իսկ այսօր տանել չեն կարող իրենց ար-
դի հպատակ վիճակը. դրանք ատում են Հայաստա-

նը, դրանք ձգտում են գէպի հիւսիս: Թուրքերը, որովհետեւ նոյնպէս երէկւայ իշխողի հոգեբանութիւնն ունեն, հայի լուծը աւելի է նրանց համար ատելի, քան որեւէ այլ բան աշխարհում. դրանք ձգտում են գէպի Տաճկաստան. դրանք պատրաստ են ոչ միայն քաղաքականապէս վերացնել Հայաստանը, այլ եւ Ֆիզիկապէս ոչնչացնել հայ ժողովուրդը:

Ահա այս տարերը շատ նպաստաւոր հող են ներկայացնում բօլշևիկ դաւաճանների համար, որոնք յոյս ունէին իրենց մութ նպատակների համար օգտուել նաև մեր ժողովրդի մէջ հացի պակասից և ֆինանսական ծանր կացութիւնից ծայր տւած դժգոհութիւնից:

Յեղաշրջման գործը Հայաստանում դիւրացնելու համար պէտք էր արտաքին ուժերի մի գրոհ: Բայց որովհետեւ ռուս բօլշևիկեան զօրքերը չէին կարող մօտենալ Հայաստանին, պէտք էր ազդել Հայաստանի իշխող կուսակցութեան վրա գէթ սպառնալիքներով, որպէսզի կարելի լինէր այդ կուսակցութեան շարքերում շփոթ ու խուճապ առաջացնել և այդ ճանապարհով ստիպել Հայաստանի կառավարութեանը, որպէսզի նա առանց դիմադրութեան գիջէ իր դիրքերը բօլշևիկ անւան տակ թագնւող դաւաճաններին: Այդ ըսպառնալիքի դերը կոչւած էին կատարելու այն երկու վերջնագրերը (ուլտիմատումները), որ իրար յետևից ներկայացրին Բագւի «նոր» տէրերը և բօլշևիկների կովկասեան ճակատի ներկայացուցիչները:

Ոչ Ադրբէջանը կարող էր մեր գէմ մեծ զօրքեր ուղարկել, ոչ էլ ռուս բօլշևիկները: Ռազմական ոյժերի փոխյարաբերութիւնը Անդրկովկասում մնում էր նոյնը: Ուստի թէ թուրքական և թէ ռուսական ըսպառնալիքների յետևում չէր կարող լինել որ և է լուրջ, իրական վտանգ, որի վտխի տակ Հայաստանի

կառավարութիւնը հարկադրւած զգար իրան անձնա-
տուր լինելու :

Եւ եթէ Ադրբէջանի և ուսնեբի «սովետական»
սպառնալիքները չմոլորեցրին և խուճապի չմատնեցին
մեզ, սակայն նրանք եղան այն ազդանշանը, որից
սիրտ առան մեր ներքին դաւաճաններն իրենց սե-
զորժը սկսելու համար :

Եւ այսպէս բռնկեց Բօլշևիկեան ապստամբու-
թիւնը Հայաստանում :

Եւ քանի որ այդ ապստամբութիւնն իրօք թե-
լադրւած էր դրսից և ղեկավարւում էր դրսից, նա-
պէտք է և ծառայէր դրսի նպատակներին : Այդ նպա-
տակներին մէջ ամենակարևոր տեղը բռնում է Տաճ-
կաստանին անմիջական օգնութիւն հասցնելու խըն-
դիրը : Մայիսի 10-ին դաշնակիցները պիտի ներկայա-
ցընէին տաճիկներին հաշտութեան դաշնագիրը, ըստ
որի Տաճկաստանը պիտի բաժան-բաժան լինէր : Տաճ-
կաստանից բաժանւող մասերից մէկն էլ Հայաստանն
է : Հայաստանում խլրտումներ առաջ բերելով և դաշ-
նակցական կառավարութիւնը տապալելով, կարելի
էր այնպիսի մահացու հարւած հասցնել այդ երկ-
րին, որ այլեւս նրա վերականգնման մասին խօսք
չլինէր :

Բօլշևիկեան յեղաշրջումը Հայաստանում պիտի
լինէր այն նոր, չափազանց էական փաստը, որ բոլո-
բովին պիտի խառնէր դաշնակիցների խաղաքարթերը
Մերձաւոր Արևելքում, և պիտի ստիպէր նրանց հիմ-
նովին վերաքննել Սան-Տէմօի մէջ մշակւած տաճկա-
կան դաշնագիրը ի նպաստ թիւրքիայի :

Բօլշևիկեան Հայաստանը հարկաւ չպիտի կարո-
ղանար պահպանել իր սահմանները : Ղարաբաղն ու
Ջանգեզուրը պիտի անցնէին առանց դժւարութեան
Ադրբէջանի թուրք «կարմիր» բանակի ձեռքը : «Կար-

միր» նախիջևանն ու Ջանգիրասարը պիտի գրաւէին հեշտութեամբ Երևանը: «Կարմիր» Տաճկաստանն ու Ադրբէջանը պիտի միանային: Եւ չորս կողմից օղակաւ փոքրիկ, շատ փոքրիկ բօլշևիկեան Հայաստանը պիտի արիւնքամ լինէր ներքին քաղաքացիական կռւից, որ պիտի լինէր անխուսափելի հետեանքը բօլշևիկեան յեղաշրջման:

Եւ մի գեղեցիկ օր, երբ այլևս պէտք չէր լինի «Կարմիր» կօմեդիայի, Ադրբէջանի և Տաճկաստանի արիւնարբու վարիչները գէն պիտի շարտէին կարմիր դրօշակը ու կարմիր զարդարանքները՝ իրենց միւս գրպանից հանելու և նորէն բարձրացնելու համար համխաւսական այն սրբազան կանաչ դրօշակը, որի վրա նրանք երգել էին միշտ և որին նրանք հաւատարիմ են եղել և «Կարմիր» դրօշակի օրով:

X

ԲՕԼՇԵՒԻՉՄԻ ՌԷԱԿՑԻՈՆ ԲՆՈՅԹԸ

Ամեն մի յեղաշրջման նշանակութիւնն ու էութիւնը կարելի է չափել այն սէալ ուժերով, որոնց միջոցով կատարուում է յեղաշրջումը և որոնց վրա յենում է կամ յենուելու է նրա իշխանութիւնը:

Անշուշտ ամեն մի յեղաշրջում ունի իր ներքին գաղափարական մղումներն ու տրամաբանութիւնը, իր սւրոյն ձևերն ու նշանակութիւնը, որոնք չեն կարող իրենց ինքնայատուկ դրոշմը չդնել իրերի ընթացքի վրա: Սակայն յեղաշրջման հետեանքների վրա ամենավճռական ազդեցութիւնն ունեն այն սէալ ուժերը, որոնք կոչւած են իրագործելու յեղաշրջման նպատակները: Այդ ուժերից է ի վերջոյ կախւած յեղաշրջման բովանդակութիւնն և վախճանական ուղղութիւնը:

Այսպէս, օրինակ, Ռուսաստանի սօվետական յեղաշրջման բօլշևիկ ղեկավարները հրապարակեցին սօցիալիստական նշանաբաններով և զուտ բանւորական քաղաքական նպատակներով, իրենց կատարած յեղաշրջման նրանք տւին իրենց կամեցած ձևը, բայց նրանց առաջնորդած յեղաշրջման բովանդակութիւնն ու վախճանական ընթացքը միանգամայն հակառակ դուրս եկաւ նրանց սկզբնական նպատակներին, որովհետև այն ուէալ ոյժերը, որոնց միջոցով նրանք հարկադրւած էին պաշտպանել իրենց իշխանութիւնն և իշխանութեան նոր ձեւերը, բաղկացած էին գերազանցապէս գիւղացիներից, իսկ գիւղացիները հարկաւ չէին կարող յենարան լինել զուտ բանւորական, պրօլետարական իշխանութեան համար, չէին կարող կոյր գործիք լինել զուտ պրօլետարական նպատակների համար:

Մի ուրիշ, մեզ համար աւելի հրահանգիչ օրինակ կարող է լինել սօվետական յեղաշրջումը Բազում 1918 թ. մարտ ամսին:

Այն ժամանակ, ինչպէս կ'յիշէ ընթերցողը, ռուսական զօրքերի վերջին մնացորդներն էին փախչում Անդրկովկասից, տաճկական բանակն ու հորդանները արշաւում էին մեր սահմանների վրա, ամբողջ թըրքութիւնը կովկասում ոտքի էր կարգնել, և բովանդակ հայութեան Ֆիզիքական գոյութիւնը վտանգւած էր մահացու կերպով: Այդպիսի ողբերգական պայմաններում Բազւի մէջ փակւած հայ ռազմական ոյժերը՝ աւելի յաջող կերպով թիւրքի դէմ պաշտպանւելու համար՝ միացան ռուս բօլշևիկներին հետ, որովհետև այդ միջոցով էր միայն, որ հայութիւնը կարող էր կապ պահպանել ռուսական Հիւսիսի հետ եւ այնտեղից թերեւս ռազմական օգնութիւն ստանալ:

Հայկական զօրքերը, որոնք իրենց ճնշող մեծա-

մասնութեամբ դաշնակցականներ էին, հարկաւ ոչ մի գաղափարական հակում չունէին դէպի բօլշևիզմը: Բայց նրանք առանց սրիէ դժւարութեան, ենթարկւեցին Բագւի սօվետական նոր իշխանութեան, հենց որ Հ. Յ. Դաշնակցութեան Բագւի կենտրոնական կօմիտէն և Բագւի Հայոց Ազգային Խորհուրդը համապատասխան հրահանգ տւին: Ինչ^ու. սրովհետև հայ ժողովրդական զանգւածների գիտակցութեան մէջ բօլշևիկեան իշխանութիւնն այն ժամանակ Բագւում կոչւած էր կատարելու այն մեծ գործը, որ կատարում էին թէ Հ. Յ. Դաշնակցութիւնը և թէ Հայոց Ազգային Խորհուրդը: Այդ մեծ գործը կռիւն էր թրքական վտանգի դէմ:

Բօլշևիկները, թէ ուս, թէ հայ, միամտութիւն ունեցան կարծելու, որ, եթէ հայկական զօրքերն այդքան հեշտութեամբ ենթարկւեցին իրենց իշխանութեան, դա նշանակում է, թէ նրանք բօլշևիկներ են արդէն և թէ կարելի է նրանց միջոցով անել այն աւերներ, ինչ որ իրենց՝ բօլշևիկներին է հաճելի: Հաստատելով իրենց իշխանութիւնը գերազանցապէս Հ. Յ. Դաշնակցութեան ռազմական ուժերի օգնութեամբ, բօլշևիկները մանկամտօրէն երևակայեցին, թէ կարող են նոյնիսկ Հ. Յ. Դաշնակցութեան հետ էլ վարւել այնպէս, ինչպէս վարւել էին Մուսաւաթի հետ: Նրանք չքաշուեցին անգամ յայտարարելու իրենց պաշտօնական օրգանի բերանով, թէ ջախջախւած է Մուսաւաթը, այժմ էլ հերթը հասել է Դաշնակցութեան:

Այս բոլորը հետևանք է այն բանի, որ բօլշևիկներն աւելի մեծ կարևորութիւն են տալիս ձեւին, քան բովանդակութեան, որ նրանք երբէք չեն թափանցում իրիրի և երևոյթների խորքը: Այդ պատճառով 1918 թ. Բագւում նրանք չհասկացան, որ նրանց «սօվետական» իշխանութիւնը գոյութիւն ունի

միմիայն Ղ. Յ. Գաշնակցութեան բարի կամեցողութեամբ: Չկայ այդ կամեցողութիւնը, չկան և նրանք, բօլշեիկները:

Եւ իրաւ. երբ պարզեց, որ սօվետական Ռուսաստանը ի վիճակի չէ բաւականաչափ ռազմական օգնութիւն հասցնելու Բազել տեղական ոյժերին՝ յետ մղելու համար թուրք տաճկական գրոհը, Ղ. Յ. Գաշնակցութիւնն ամենայն դիւրութեամբ տապալեց բօլշեիկների իշխանութիւնը Բազելում և զինաթափ արեց զուտ բօլշեիկեան ոյժերը:

Եթէ մենք դառնանք այժմ Ադրբէյջանում նորերս տեղի ունեցած յեղաշրջման, կտեսնենք, որ այդ յեղաշրջումը ըստ էութեան շատ քիչ է տարբերում 1918 թ. մարտին կատարւած սօվետական յեղաշրջումից: Միայն դերերն են փոխւել: Այն ժամանակ հայերն էին, որ թիւրքերի դէմ կռւելու համար դիմել էին ռուս բօլշեիկի օգնութեան: Իսկ այս անգամ թուրքերն են, որ հայի դէմ կռւելու համար դիմել են ռուս բօլշեիկի օգնութեան: Երկու դէպքումն էլ ռուս բօլշեիկեան իշխանութիւնն այն չափով է ցանկալի եւ կայուն, որ չափով որ նա ծառայում է իր վրա դրւած պարտականութեան, իր առջեւ դրւած նպատակին:

Եւ ինչպէս որ 1918 թ. հայերը յուսախար եղան և քշեցին բօլշեիկներին, այնպէս էլ այժմ թուրքերն անխուսափելիօրէն պիտի յուսախար լինեն «սօվետական» իշխանութիւնից եւ քշեն բօլշեիկներին: Որովհետեւ թէ 1918 թ. թէ այս տարի ռէալ ոյժը Բազելում բօլշեիկներին հարազատ ոյժ չէ: Որովհետեւ թէ 1918 թ. եւ թէ այս տարի բօլշեիկները կոչւած են Բազելում իրենց համար միանգամայն օտար նպատակներ իրագործելու: Եւ հինց որ պարզի, թէ բօլշեիկեան այժմեան իշխանութիւնը Ադրբէյջանում ի վի-

ճակի չէ աւելի մեծ յաջողութեամբ կատարելու այն, ներկայ դէպքում, հակահայկական գործը, որի համար նա հաստատուած է, այդ իշխանութիւնը մի վայրկեան իսկ չպիտի կարողանայ այլեւս գոյութիւն ունենալ:

Սօվետական յեղաշրջումն Ադրբէջանում արդիւնք չէր այդ երկրի ուշալ ուժերի փոխյարաբերութեան հիմնական փոփոխութեան, այլ միայն և միայն քաղաքական որոշ կօմբինացիաների: «Կարմիր» Ադրբէջանի ուշալ ուժերի մտայնութիւնը, քաղաքական շահերն և սօցիալական մղումները մնացին նոյնը, ինչ որ էին «կանաչ» Ադրբէջանի մէջ:

«Կարմիր» դրօշակը Ադրբէջանին պէտք է ոչ թէ ներքին, այլ արտաքին գործածութեան համար. նա պէտք է դրսի աշխարհը մոլորեցնելու, խաբելու համար. նա պէտք է ոչ-իսլամական ժողովրդների մտքի մէջ քաօս, խառնաշփոթութիւն յարուցելու համար: «Կարմիր» դրօշակը Ադրբէջանի համար մի հասարակ լաթ է, որ դէն պիտի շարտել, հէնց որ նրա կարիքն այլևս չգագելի, և նոյնքան դիւրութեամբ ու արագութեամբ, որքան նա բարձրացւեց այդ իսլամական երկրի վրա: Շուշում Ադրբէջանի նորընծայ բօլշևիկները կազմել են արդէն մի «յեղափոխական» կօմիտէ, որի նախագահն է ամբողջ Ղարաբաղին քաջ յայտնի դահճապետ Սուլթանօվը: Այդ կօմիտէն արդէն մի կոչ է հրատարակել՝ ուղղւած Ղարաբաղի հայ աշխատաւոր գիւղացիութեան: Սուլթանօվը «յեղափոխական» կօմիտէն առաջարկում է հայ գիւղացիներին՝ տապալել դաշնակցական կառավարութիւնը, հաստատել «սօվետական» իշխանութիւն և հաշտութիւն կնքել «կարմիր» թուրք աշխատաւորութեան հետ:

Մենք գիտենք արդէն, որ երբ «սօվետական» յեղաշրջում տեղի ունեցաւ Բազում, Ադրբէջանի նոր կառավարութեան առաջին քայլն եղաւ՝ Հայաստանի

դէմ անմիջապէս պատերազմական գործողութիւններ սկսելու սպառնալիքով՝ պահանջել Ղարաբաղի և Ջանգեղուրի յանձնումը Ադրբէջանին: Մեզ ծանօթ է և մի ուրիշ սպառնալիք, որ եկաւ Հիւսիսից:

Ինչ էր այդ սպառնալիքների բուն նպատակը: Ահաբեկում խառնաշփոթութիւն, խուճապ առաջացընել Հայաստանում եւ դիւրացնել այդպիսով մեր կառավարութեան տապալումը «ներքին» բօլշևիկների միջոցով:

Սակայն այժմ, երբ թէ «ներքին» և թէ «արտաքին» բօլշևիկների համար պարզեց, որ սպառնալիքը չի հասնում իր նպատակին, այլ ընդհակառակը, աւելի ևս սեղմում է Հայաստանի կառավարութեան հաւատարիմ շարքերը, նրանք կամենում են ուրիշ, աւելի «խաղաղ» ճանապարհով ազդել հայ ժողովրդի վրա: Թէ Ադրբէջանը, թէ Հիւսիսը մեզ հետ հաշտութեան բանակցութիւնների մէջ են մտնում: «Կարմիր» թուրքերը, ինչպէս, օրինակ, Շուշայ «կարմիր» կօմիտէն՝ Սուլթանօվի գլխաւորութեամբ, գառան մորթի հազած գայլերի նման հաշտութեան ձեռք են մեկնում Ղարաբաղի հայ գիւղացիներին, խնդրելով միայն մի փոքրիկ բան անել — տապալել անիծեալ դաշնակցականներին, որոնք իրենց հանգիստ չեն տալիս:

Բայց թող չմոլորւեն հայ ժողովրդի և Անկախ ու Միացեալ Հայաստանի արթուն հսկիչները: Բօլշևիկ անւան տակ թագնւած թուրքերը, ինչպէս նաև ոռուսները, ամենևին չփոխւեցին մի երկու շաբաթւայ ընթացքում: Ինչպէս այն ժամանակ, երբ նրանք մեզ սպառնում էին՝ պատերազմով, այնպէս էլ այժմ, երբ նրանք «հաշտութեան» ձեռք են մեկնում մեզ, նրանք երդւեալ թշնամիներն են Անկախ Հայաստանի և հայ աշխատաւոր ժողովրդի:

Պատերազմի սպառնալիքները, ինչպէս եւ հաշ-

տութեան բանակցութիւնները տարբեր ձևեր, միջոց-
ներ են միայն նոյն հայաջինջ նպատակին հասնելու
համար: Թշնամին ձգտում է, ինչ գնով էլ լինի, ինչ
միջոցով էլ լինի, կործանել Անկախ եւ Միացեալ
Հայաստանը, բնաջինջ անել հայ դիմօկրատիան, որով-
հետեւ վերջինս կանգնած է թէ ուս թօլշեիկի, թէ
թուրք «թօլշեիկի» — ճանապարհի վրա:

Թող ոչ ոք միամիտ հաւատը չունենայ, որ ան-
գամ կնքւած հաշտութիւնը թօլշեիկ կոչւած թշնամու
հետ պիտի իրօք բերի մեր երկրին խաղաղութիւն:
Ընդհակառակը, երբ թօլշեիկներ չկային Բազում,
Արդրկովկասում կար միայն մի պատերազմ — հայ-
թուրքական: Բայց բաւական էր, որ նրանց դրօշակը
ծածանէր Ազրբէջանում, և մենք ունեցանք մի նոր
պատերազմ ևս թուրք—վրացական: Եւ կարելի է ա-
ռանց վերապահութեան պնդել, որ, եթէ թօլշեիկները
որեւէ յաջողութիւն ունենան Հայաստանում կամ վը-
րաստանում, մենք պիտի ունենանք Անդրկովկասում
և մի երրորդ պատերազմ հայ—վրացական: Վերջա-
պէս, թօլշեիկները չէին լինի թօլշեիկ, եթէ այդ բո-
լոր ճակատների վրա չաւելցնէին նաև ներքին ճա-
կատներ մեր դժբախտ ժողովուրդների ծոցում: Չէ՞ որ
նրանց նշանաբանն է— քաղաքացիական պատերազմը,
այսինքն ներքին եղբայրասպան պատերազմը,

Արիւն, անվերջ արիւն, ծով արիւն պիտի հոսի
Անդրկովկասում, որպէսզի յագենայ Ռուսաստանը,
որպէսզի յագենայ Տաճկաստանը: Որովհետեւ միայն
փոքր ազգերի անկախութեան ոտնահարման և փոքր
ազգերի Ֆիզիքական բնաջնջման միջոցով է, որ թէ
Ռուսաստանը և թէ Տաճկաստանը ապահովւած պիտի
տեսնեն իրենց շահերը Մերձաւոր Արևելքում:

Թէ ո՞ր աստիճան զգաստ, զգուշաւոր, արթուն
և միաժամանակ վճռական պիտի լինի մեր վերաբեր-

մունքը դէպի բօլշևիկները, այդ պարզ պիտի լինի
ամենքի համար, եթէ մատնանշենք այստեղ այն երկ-
դիմի ընթացքը, որ բռնել է սօվետական Ռուսաս-
տանը հանդէպ վրաստանի: Յայտնի է, որ սօվետա-
կան Ռուսիան հաշտութիւն է կնքել վրաստանի հետ
և ճանաչել է վերջինիս անկախութիւնը: Սակայն մի-
աժամանակ նոյն սօվետական Ռուսիան «սօվետական»
Ադրբէջանի միջոցով պատերազմ է մղում նոյն վրաս-
տանի դէմ:

Բայց մի՞թէ նոյնը չի անում սօվետական Ռու-
սաստանը նաև Հայաստանի վերաբերմամբ: Նա մեզ
առաջարկում է սկսել իր հետ հաշտութեան բանակ-
ցութիւններ, նա նախօրոք ճանաչում է մեր անկա-
խութիւնը, սակայն միևնոյն ժամանակ իրեն յատուկ
նենգամտութեամբ շարունակում է, իր վարձկան գոր-
ծակալների միջոցով, խլրտումներ առաջ բերել, ապըս-
տամբութիւն կազմակերպել մեր երկրի մէջ՝ օդը ցըն-
դեցնելու համար Ազատ, Անկախ և Միացեալ Հայաս-
տանի շէնքը: Կարելի՞ է միթէ հաւատալ, որ մեր պե-
տութեան մէջ և մեր պետութեան դէմ վերջին շա-
բաթների ընթացքում նիւթւող դաւերը կատարւում
են միայն տեղական, անդրկովկասեան բօլշևիկների
նախաձեռնութեամբ և որ այդ բոլորի մէջ ռուսական
կենտրոնը որևէ մասնակցութիւն չունի:

Հայաստանը, որ բոլոր երկիրների մէջ ամենից
աւելի կարօտ է խաղաղութեան և շինարար աշխա-
տանքի, չի կարող ունէլ յոյս դնել բօլշևիզմի վրա,
որովհետև բօլշևիզմը գերեզման է հայ ժողովրդի ֆի-
զիքական գոյութեան և նրա քաղաքական անկախու-
թեան համար:

Եթէ որևէ ուրիշ երկրի վերաբերմամբ խօսք կա-
րող է լինել բօլշևիզմի յեղափոխական բնոյթի և դե-
րի մասին, — մի բան, որ միանգամայն ես ժխտում
եմ, մեզ մօտ յամենայն դէպս բօլշևիզմը բացարձա-

կապէս մի հակայեղափոխական, հակապետական և յե-
տադարձ, ունակցիօն շարժում է: Որովհետև որևէ
քաղաքական հոսանքի կամ շարժման յեղափոխակա-
նութիւնը չափւում է ոչ թէ նրա յեղափոխական ֆը-
րազներով ու աղաղակներով, այլ նրա յեղափոխական
գործերով կամ, աւելի ճիշտը, նրա կատարած գոր-
ծերի յեղափոխական արդիւնքներով: Մինչդեռ, ինչ-
պէս մենք տեսանք, բօլշևիզմը ամենուրեք իր հետ և
իր յետևից բերում է ամենասև ունակցիա թէ քաղա-
քական, թէ սօցիալական և թէ տնտեսական ասպա-
րէզում: Իսկ Հայաստանում բօլշևիզմը ունակցիօն շար-
ժում է կրկնակի տեսակէտով, որովհետև մեր սահ-
մանների մէջ նա յենւում է նաև բացայայտօրէն ուն-
ակցիօն տարրերի վրա: Մենք գիտենք արդէն, որ
բօլշևիկները յինարանը եղել են դենիկինեան սպա-
ներն ու զինւորները, նախկին ռուս զինւորները,
ռուս աղանդաւորները, որոնք երազում են ցարական
Ռուսաստանի վերականգնման մասին, և վերջապէս,
թրքութիւնը, որի իդէալն է համիսլամական մեծ
կայսրութիւնը:

Բօլշևիզմի և համիսլամութեան դաշնը մի պա-
տահական, բռնազբօսիկ բան չէ, ինչպէս կարծում են
շատերը: Դա մի բնական եղբայրակցութիւն է աշ-
խարհիս ամենաունակցիօն երկու ոյժերի՝ ռուսութեան
և թրքութեան: Մօնօզօլական ոգին եւ մօնօզօլական
արիւնն է, որ այստեղ միացրել է երկու արիւնակից
մօնօզօլական ցեղերը՝ ռուս և թուրք ցեղերը մի ընդ-
հանուր ասիական պայքարի մէջ ընդդէմ առաջաւոր
Եւրօպայի, ընդդէմ համաշխարհային կուլտուրայի:

Կուել բօլշևիզմի դէմ նշանակում է կուել խա-
ւարի և ստրկութեան դէմ...



Մօտ օրէն հրապարակ
կ'ելլէ տաղանդաւոր գրագէտ
Գրիգոր Զօհրապի
Եւրոպա կատարած
նամբորդութեան տպաւորու-
թիւնները հեղինակին
ամենավերջին լուսանկարով

“ՍԵՒԱՆ,” ՀՐԱՏԱՐԱԿԶԱԿԱՆ ԸՆԿԵՐՈՒՓԵԱՆ

ԱՌԱՋԻՆ ԵՐԵՔ ԳՈՐԾԵՐԸ


- 1.— Ամուսնութեան խնդրանք (Ջալեթ) դր. հեղ. Հանրի Պորսո քարգ. Ժան Նօէլ 10
- 2.— Ժիւլ Բայետի Խորհուրդները կրթական մեակներուն, հայացուց Ա. Պալեան 40
- 3.— Բօլշեւիզմը եւ Հայաստան Ռ. Գարբինեան 25


ՄԱՄՈՒԼԻ ՏԱԿ ԵՆ

- 1.— Ուղեւորի նօթեր, Գ. Զօհրապ
- 2.— Անձկութեան ժամեր (վիպակ) Զապէլ Եսայեան
- 3.— Օսար վայրերում (Պօլիս, Իզմիր, Եգիպտոս) Ա. Շիրվանզադէ
- 4.— Արուեստի երգեր (ֆերթուածներ) Անտոն Կազել
- 5.— Ծանօթ դէմքեր, Գ. Զօհրապ

Գին 25 Ղր.:

Ամերիկայի համար 25 Սէնթ





ԳԱԱ Հիմնարար Գիտ. Գրադ.



FL0191224

In

A $\frac{\bar{u}}{81178}$